

李太白詩

國學珍本  
名家詩鈔

上海大中華書局刊行

上海圖書館藏書

上海图书馆藏书



A541 212 0016 67368

# 李太白詩集目錄

古近體詩共三十五首

送韓侍御之廣德

白雲歌送友人

送通禪師還隱靜寺

送友人

送別

江上送女道士褚三清

送友人入蜀

送趙雲卿

送李青歸華陽川

送舍弟

送別

送鞞十少將

送張秀才謁高中丞

送弟昌嗣鄱陽司馬作

餞校書叔雲

送王孝廉覲省

送杜秀芝舉入京

送呂使君杲流澧州

送陳郎將歸衡陽

送趙判官赴黔府幕

送陸判官往琵琶峽

送梁四歸東平

江夏送友人

送鄒昂謁巴中

江夏送張丞

賦得白鷺鷥送宋少府

送二季之江東

江西送友人之羅浮

謝眺樓餞別校書叔雲

宣城送劉副使入秦

涇川送族弟綽

五松山送殷淑

送崔氏昆季之金陵

送族弟溧陽尉濟

送儲邕之武昌

古近體詩共三十二首

酬談少府

酬宇文少府

五月東魯行答汶上翁

單父南樓酬竇公衡

山中問答

答友人贈烏紗帽

謝張司馬贈墨

答湖州迦葉司馬

答崔少府遊翠微寺

附贈李十二崔宗之

酬崔五郎中

以詩代書答元丹邱

金門答蘇秀才

酬王司馬閻正字見贈

酬中都小吏

酬張卿夜宿南陵見贈

酬岑勛以詩見招



答弟幼成過西園見贈

謝王補闕贈別

謝裴侍御對雨見贈

附贈李十二崔成甫

謝崔侍御

瓶月金陵城西

江上答崔宣城

答僧中孚贈仙人掌茶

謝裴侍御留岫師彈琴

張相公出鎮荊州

辭後答丁十八

答裴侍御以書見留

答高山人權顧二侯

答杜秀才五松山見贈

謝韓侍御見招隱黃山

謝崔十五見招

答王十二寒夜獨酌

古近體詩共六十首

遊南陽白水登石激作

遊南陽清冷泉

尋魯城北范居士失道

東魯門泛舟二首

秋獵孟諸夜歸置酒

遊太山六首

與劉錫山汎宴喜亭池

攜妓登梁王樓霞山

與從姪良遊天竺寺

同友人舟行

過斛斯山人宿置酒

朝下過盧郎中叙舊遊

侍從遊宿溫泉宮作

攜鄆南亭觀妓

春日遊羅敷潭

陪從祖泛鵲山湖三首

陪楊江寧宴北湖感古

宴鄭參卿山池

遊謝氏山亭

把酒問月

遊昌禪師山池二首

金陵鳳凰臺置酒

秋浦清溪雪夜對酒

與周剛玉鏡潭宴別

遊秋浦白紵陂二首

宴陶家亭子

宴韋司馬樓船觀妓

宴興德寺南閣

泛汜州城南郎官湖

陪侍郎叔遊洞庭三首

夜泛洞庭尋裴侍御

陪族叔曄遊洞庭五首

宴楊執戟治樓

劉官山辭後絕句

與常贊府遊五松山

宣城清溪

與謝良輔遊陵巖寺

遊水西簡鄭明府

九日登山

九日

九日龍山飲

九月十日即事

(3) 李太白詩集目錄

遷化城寺升公清風亭

古近體詩共三十六首

登錦城散花樓

登峨眉山

大庭庫

登單父陶少府半月臺

天台曉望

早望海霞邊

焦山望松寥山

杜陵絕句

登太白峯

登鄆城洪波臺觀發兵

登新平樓

謁老君廟

秋日登揚州西靈塔

登治城西北謝安墩

登瓦官閣

登梅岡望金陵贈中孚

登金陵鳳凰臺

望廬山瀑布二首

望廬山五老峯

江上望皖公山

望黃鶴山

鸚鵡洲

九日登巴陵置酒

秋登巴陵望洞庭

與夏十二登岳陽樓

登巴陵開元寺西閣

與賈至舍人望瀟湖

挂席江上待月有懷

金陵望漢江

秋登宣城謝朓北樓

望天門山

望木瓜山

登敬亭北二小山

過崔八丈水亭

登廣武古戰場懷古

古近體詩共五十八首

安州應城玉女湯作

宿常二南郭幽居

夜下征虜亭

下途歸石門舊居

客中作

太原早秋

奔亡道中五首

鄂門秋懷

上白馬磯贈裴侍御

荆門浮舟望蜀江

上三峽

自巴東舟行經瞿塘峽

早發白帝城

秋下荆門

江行寄遠

宿五松山下荀媪家

下涇縣陵陽溪至澗灘

下陵陽公高溪

夜泊黃山

宿猗湖

西施

王右軍

上元夫人

蘇臺覽古

越中覽古

商山四皓

過四皓墓

峴山懷古

蘇武

經下邳圯橋懷張子房

金陵三首

秋夜板橋浦汎月獨酌

過彭蠡湖

入彭蠡經松門觀石鏡

廬江主人婦

陪宋中丞武昌夜飲

望鸚鵡洲悲禰衡

宿巫山下

金陵白楊十字巷

謝公亭

紀南陵題五松山

夜泊牛渚懷古

姑熟溪

丹陽湖

謝公宅

陵歛臺

桓公井

慈姥竹

望夫山

牛渚磯

靈墟山

天門山

古近體詩共四十七首

與元丹邱方城寺談玄

尋石門山中元丹邱

安州般若寺水閣納涼

魯中都東樓醉起作

對酒醉題屈突明府廳

月下獨酌四首

春歸終南山松龍舊隱

醉宿龍門覺起言志

尋山僧不遇作

過汪氏別業二首

待酒不至

獨酌

友人會宿

春日獨酌二首

金陵江上遇蓬池隱者

月夜聽盧子順彈琴

青溪半夜聞笛

月夕山中忽然有懷

夏日山中

山中與幽人對酌

春日醉起言志

廬山東林寺夜懷

尋雍尊師隱居

聽黃鶴樓上吹笛

對酒

醉題王漢陽廳

嘲王慙陽不肯飲酒

獨坐敬亭山

自遣

訪戴天山道士不遇

楚城韋公藏書高齋作

秋夜獨坐懷故山

憶崔宗之遊南陽感舊

憶東山二首

望月有懷

對酒憶賀監二首

重憶一首

春滯沅湘有懷山中

落日憶山中

憶秋浦桃花舊遊

古近體詩共六十五首

越中秋懷

效古二首

擬古十二首

感興八首

寓言三首

秋夕旅懷

感遇四首

翰林讀書言懷

尋陽紫極宮感秋作

江上秋懷

秋夕書懷

避地司空原言懷

上崔相百憂章

萬憤詞投魏郎中

荊州賊亂臨洞庭言懷

覽鏡書懷

田園言懷

江南春懷

聽蜀僧濬彈琴

魯東門觀刈蒲

詠鄰女東窗海石榴

南軒松

詠山樽二首

初出金門詠壁上鸚鵡

紫藤樹

觀放白鷹二首

王志安少府山水粉圖

題雍邱崔明府丹竈

觀元丹邱坐巫山屏風

求崔山人瀑布圖

見草中有名白頭翁者

流夜郎題葵葉

瑩禪師房觀山海圖

白鷺鷥

詠槿二首

白胡桃

巫山枕障

南奔書懷

國學基  
本詩選

# 李太白詩集

## 古近體詩共三十五首

### 送韓侍御之廣德

昔日繡衣何足榮。今宵貰酒與君傾。暫就東山賒月色。酣歌一夜送泉明。

### 白雲歌送友人

楚山秦山多白雲。白雲處處長隨君。君今還入楚山裏。雲亦隨君渡湘水。水上女蘿衣白雲。早臥早行君早起。

### 送通禪師還南陵隱靜寺

我聞隱靜寺。山水多奇蹤。巖種朗公橘。門深杯渡松。道人制猛虎。



振錫還孤峯。他日南陵下。相期谷口逢。

送友人

青山橫北郭。白水遶東城。此地一爲別。孤蓬萬里征。浮雲遊子意。落日故人情。揮手自茲去。蕭蕭班馬鳴。

送別

斗酒渭城邊。壚頭醉不眠。梨花千樹雪。楊葉萬條烟。惜別傾壺醕。臨分贈馬鞭。看君頰上去。新月到應圓。

江上送女道士褚三清遊南岳

吳江女道士。頭戴蓮花巾。霓衣不濕雨。特異陽臺雲。足下遠遊履。凌波生素塵。尋仙向南岳。應見魏夫人。

送友人入蜀

見說蠶叢路。崎嶇不易行。山從人面起。雲傍馬頭生。芳樹籠秦棧。春流遶蜀城。升沉應已定。不必問君平。

送趙雲卿

白玉一杯酒。綠楊二月時。春風餘幾日。兩鬢各成絲。乘濁唯須飲。投竿也未遲。如逢渭川獵。猶可帝王師。

送李青歸華陽川

伯陽仙家子。容色如青春。日月祕靈洞。雲霞辭世人。化心養精魄。隱几窅天真。莫作千年別。歸來城郭新。

送舍弟

吾家白額駒。遠別臨東道。他日想思一夢君。應得池塘生春草。

送別

水色南天遠。舟行若在虛。遷人發佳興。吾子訪閑居。日落看歸鳥。潭澄羨躍魚。聖朝思賈誼。應降紫泥書。

### 送鞠十少府

試發清秋興。因爲吳會吟。碧雲斂海色。流水折江心。我有延陵劍。君無陸賈金。艱難此爲別。惆悵一何深。

### 送張秀才謁高中丞并序

余時繫尋陽獄中正讀留侯傳秀才張孟熊蘊滅胡之策將之廣陵謁高中丞余喜子房之風感激於斯人因作是詩以送之

秦帝淪玉鏡。留侯降氛氳。感激黃石老。經過滄海君。壯士揮金槌。報讎六國聞。智勇冠終古。蕭陳難與羣。兩龍爭鬪時。天地動風雲。酒酣舞長劍。倉卒解漢紛。宇宙初倒懸。鴻溝勢將分。英謀信奇絕。

夫子揚清芬。胡月入紫微。三光亂天文。高公鎮淮海。談笑却妖氛。  
採爾幕中畫。戡難光殊勳。我無燕霜感。玉石俱燒焚。但灑一行淚。  
臨岐竟何云。

尋陽送弟昌峒鄱陽司馬作。

桑落洲渚連。滄江無雲烟。尋陽非剡水。忽見子猶船。飄然欲相近。  
來遲杳若仙。人乘海上月。帆落湖中天。一覩無二諾。朝歡更勝昨。  
爾則吾惠連。吾非爾康樂。朱紱白銀章。上官佐鄱陽。松門拂中道。  
石鏡迴清光。遙扇及干越，水亭風氣涼。與爾期此亭。期在秋月滿。  
時過或未來。兩鄉心已斷。吳山對楚岸。彭蠡當中洲。相思定如此。  
有窮盡年愁。

餞校書叔雲

少年費白日。歌笑矜朱顏。不知忽已老。喜見春風還。惜別且爲懽。徘徊桃李間。看花飲美酒。聽鳥臨晴山。向晚竹林寂。無人空閉關。

送王孝廉覲省

彭蠡將天合。姑蘇在日邊。甯親候海色。欲動孝廉船。窈窕晴江轉。參差遠岫連。相思無晝夜。東注似長川。

同吳王送杜秀芝舉入京

秀才何翩翩。王許回也賢。暫別廬江守。將遊京兆天。秋山宣落日。秀水出寒烟。欲折一枝桂。還來雁沼前。

洞庭醉後送絳州呂使君果流澧州

昔別若夢中。天涯忽相逢。洞庭破秋月。縱酒開愁容。贈劍刻王字。延年兩蛟龍。送君不盡意。書及雁迴峯。

與諸公送陳郎將歸衡陽并序

仲尼旅人文王明夷苟非其時聖賢低眉况僕之不肖者而遷逐固槁固非其宜朝心不開暮髮盡白而登高送遠使人增忌陳郎將義風凜然英思逸發來下曹城之榻去邀才子之詩動清興於中流泛素波而徑去諸公仰望不及連章祖之序慚起予輒冠名賢之首作者嗤我乃爲撫掌之資乎

—— 集 詩 白 太 李 ——

衡山蒼蒼入紫冥。下看南極老人星。迴飈吹散五峯雪。往往飛花落洞庭。氣清岳秀有如此。郎將一家拖金紫。門前食客亂浮雲。世人皆比孟嘗君。江上送行無白璧。臨岐惆悵若爲分。

送趙判官赴黔府中丞叔幕

廓落青雲心。結交黃金盡。富貴翻相忘。令人忽自哂。蹭蹬鬢毛斑。盛時難再還。巨源咄石生。何事馬蹄間。綠蘿長不厭。却欲還東山。

君爲魯曾子。拜揖高堂裏。叔繼趙平原。偏承明主恩。風霜推獨坐。旌節鎮雄藩。虎士秉金鉞。蛾眉開玉樽。才高幕下去。義重林中言。水宿五溪月。霜啼三峽猿。東風春草綠。江上候歸軒。

送陸判官往琵琶峽

水國秋風夜。殊非遠別時。長安如夢裏。何日是歸期。

送梁四歸東平

玉壺契美酒。送別強爲歡。大火南星月。長郊北路難。殷王期負鼎。汶水起垂竿。莫學水山臥。參差老謝安。

江夏送友人

雪點翠雲裘。送君黃鶴樓。黃鶴振玉羽。西飛帝王州。鳳無琅玕實。何以贈遠遊。徘徊相顧影。淚下漢江流。

送郝昂謫巴中

瑤草寒不死。移植滄江濱。東風洒雨露。會入天地春。予若洞庭葉。隨波送逐臣。思歸未可得。書此謝情人。

江夏送張丞

欲別心不忍。臨行情更親。酒傾無限月。客醉幾重春。藉草依流水。攀花贈遠人。送君從此去。迴首泣迷津。

賦得白鷺鷥送宋少府入三峽

白鷺拳一足。月明秋水寒。人鷺遠飛去。直向使君灘。

送二季之江東

初發強中作。題詩與惠連。多慚一日長。不及二龍賢。西塞當中路。南風欲進船。雲峯出遠海。帆影挂清川。禹穴藏書地。匡山種杏田。



此行俱有適。遲爾早歸旋。

江西送友人之羅浮

桂水分五嶺。衡山朝九疑。鄉關眇安西。流浪將何之。素色愁明湖。秋渚晦寒姿。疇昔紫芳意。已過黃髮期。君主縱疎散。雲壑借巢夷。爾去之羅浮。我還憩峨眉。中關道萬里。霞月遙相思。如尋楚狂子。瓊樹有芳枝。

宣州謝眺樓餞別校書叔雲

棄我去者昨日之日不可留。亂我心者今日之日多煩憂。長風萬里送秋雁。對此可以酣高樓。蓬萊文章建安骨。中間小謝又清發。俱懷逸興壯思飛。欲上青天覽明月。抽刀斷水水更流。舉杯消愁愁更愁。人生在世不稱意。明朝散髮弄扁舟。

宣城送劉副使入秦

君卽劉越石。雄豪冠當時。淒清橫吹曲。慷慨扶風詞。虎嘯俟騰躍。  
鷄鳴遭亂離。千金市駿馬。萬里逐王師。結交樓煩將。侍從羽林兒。  
統兵捍吳越。豺虎不敢窺。大勳竟莫敘。已過秋風吹。秉鉞有季公。  
凜然負英姿。寄深且戎幕。望重必台司。感激一然諾。縱橫兩無疑。  
伏奏歸北闕。鳴騶忽西馳。列將咸出祖。英寮惜分離。斗酒滿四筵。  
歌笑宛溪湄。君攜東山妓。我咏北門詩。貴賤交不易。恐傷中園葵。  
昔贈紫駟駒。今傾白玉卮。同驩萬斛酒。未足解相思。此別又千里。  
秦吳眇天涯。月明關山苦。水劇隴頭悲。借問幾時還。春風入黃池。  
無令長相思。折斷綠楊枝。

涇川送族弟諱

涇川三百里。若耶羞見之。錦石湖碧山。兩邊白鷺鷥。佳境千萬曲。客行無歇時。上有琴高水。下有陵陽祠。仙人不見我。明月空相知。問我何事來。虛敖結幽期。蓬山振雄筆。繡服揮清詞。江湖發秀色。草木含榮滋。置酒送惠連。吾家稱白眉。婢無海嶠作。敢闕河梁詩。見爾復幾朝。俄然告將離。中流漾綵鷁。列岸叢金羈。嘆息蒼梧鳳。分棲瓊樹枝。清晨各飛去。飄落天南垂。望極落日盡。秋深暝猿悲。寄情與流水。但有長相思。

五松山送殷淑

秀色登江左。風流奈若何。仲文了不還。獨立揚清波。載酒五松山。頽然白雲歌。中天度落月。萬里遙相過。撫酒惜此月。流光畏蹉跎。明日別離去。連峯鬱嵯峨。

## 送崔氏昆季之金陵

放歌倚東樓。行子期曉發。秋風渡江來。吹落山上月。主人出美酒。滅燭延清光。二崔向金陵。安得不盡觴。水客弄歸棹。雲帆卷輕霜。扁舟敬亭下。五兩先飄揚。峽石入水花。碧流日更長。思君無歲月。西笑阻河梁。

## 登黃山凌歊臺送族弟溧陽尉濟充汎舟赴華陰

鸞乃鳳之族。翩翩紫雲霓。文章輝五色。雙在瓊樹棲。一朝各飛去。鳳與鸞俱啼。炎赫五月中。朱曦爍河堤。爾從汎舟役。使我心魂悽。秦地無草木。南雲喧鼓鼙。君王減玉膳。早起思鳴鷄。漕弓救關輔。疲人免塗泥。宰相作霖雨。農夫得耕犁。靜者伏草間。羣才滿金閨。空手無壯士。窮居使人低。送君登黃山。長嘯倚天梯。小舟若鳧雁。

大舟若鯨鯢。開帆散長風。舒卷與雲齊。日入牛渚晦。蒼然夕烟迷。相思在何許。

送儲邕之武昌

黃鶴西樓月。長江萬里情。春風三十度。空憶武昌城。送爾難爲別。銜杯惜未傾。湖連張樂地。山逐汎舟行。諾謂楚人重。詩傳謝眺清。滄浪吾有曲。寄入棹歌聲。

古近體詩共三十二首

詠談少府

一尉居倏忽。梅生有仙骨。三事或可羞。匈奴哂千秋。壯心屈黃綬。浪跡寄滄洲。昨觀荆峴作。如從雲漢遊。老夫當暮矣。蹀足懼驂騑。

詠少府見贈桃竹書筒

桃竹書筒綺繡文。良工巧妙稱絕羣。靈心圓映三江月。彩質疊成五色雲。中藏寶訣峨眉去。千里提攜長憶君。

五月東魯行答汶上翁

五月梅始黃。蠶凋桑柘空。魯人重織作。機杼鳴簾櫳。顧余不及仕。學劍來山東。舉鞭訪前途。獲笑汶上翁。下愚忽壯士。未足論窮通。我以一箭書。能取聊城功。終然不受賞。羞與時人同。西歸去直道。落日昏陰虹。此去爾勿言。甘心如轉蓬。

早秋單父南樓酬竇公衡

白露見日滅。紅顏隨霜凋。別君若俯仰。春芳辭秋條。太山嵯峨夏雲在。疑是白波漲東海。散爲飛雨川上來。遙帷却卷清浮埃。知君獨坐青軒下。此時結念同所懷。我閉南樓看道書。幽簾清寂若仙居。曾無

好事來相訪。賴爾高文一起予。

山中問答

問余何意棲碧山。笑而不答心自閑。桃花流水窅然去。別有天地非人間。

答友人贈烏紗帽

領得烏紗帽。全勝白接離。山人不照鏡。稚子道相宜。

酬張司馬贈墨

上黨碧松烟。夷陵丹砂末。蘭麝凝珍墨。情光乃堪掇。黃頭奴子雙雅。錦囊養之懷袖間。今日贈余蘭亭去。興來灑筆會稽山。

答湖州迦葉司馬問白是何人

青蓮居士謫仙人。酒肆藏名三十春。湖州司馬何須問。金粟如來是後

身。

答長安崔少府叔封遊終南翠微寺太宗皇帝金沙泉見寄

河伯見海若。傲然誇秋水。小物昧遠圖。寧知通方士。多君紫霄意。獨往蒼山裏。地古寒雲深。巖高長風起。初登翠微嶺。復憩金沙泉。錢苔朝霜滑。弄波夕月圓。飲彼石下流。結蘿宿谿煙。鼎湖夢淥水。龍駕空茫然。早行子午關。却登山路遠。拂琴聽霜猿。滅燭乃星飯。人烟無明異。鳥道絕往返。樊崖倒青天。下視百日晚。既過石門隱。還唱石潭歌。涉雪攀紫芳。濯纓想清波。此人不可見。此地君自過。獨余謝風泉。其如幽意何。

贈李十二

左司郎中崔宗之附

(17)  
涼秋八九月。白露空園亭。耿耿魚水暢。梢梢風葉聲。思見雄俊士。



共話今古情。李侯忽來儀。把袂苦不早。清論既抵掌。玄談又絕倒。分明楚漢事。歷歷王霸道。擔囊無俗物。訪古千里餘。袖有匕首劍。懷中茂陵書。雙眸光照人。詞賦凌子虛。酌酒絃素琴。霜氣正凝潔。平生心事中。今日爲君說。我家有別業。寄在嵩之陽。明月出高岑。清溪澄素光。雲散窗戶靜。風吹松桂香。子若同斯游。千載不相忘。

## 謝崔五郎中

朔雲橫高天。萬里起秋色。壯士心飛揚。落日空嘆息。長嘯出原野。凜然寒風生。幸遭聖明時。功業猶未成。奈何懷良圖。鬱悒獨愁坐。杖策尋英豪。立談乃知我。崔公生民秀。緬邈青雲姿。制作參造化。託諷含神祇。海岳尙可傾。吐諾終不移。是時霜飆寒。逸興臨華池。起舞拂長劍。四坐皆揚眉。因得窮歡情。贈我以新詩。又結汗漫期。

九垓遠相待。舉身憩蓬壺。濯足弄滄海。從此凌倒景。一去無時還。朝遊明光營。暮入閭闔關。但得長把袂。何必嵩邱山。

以詩代書答元丹邱

青鳥海上來。今朝發何處。口銜雲錦字。與我忽飛去。鳥去凌紫烟。書留綺窗前。開緘方一笑。乃是故人傳。故人深相勗。憶我勞心曲。離居在咸陽。三見秦草綠。置書雙袂間。引領不暫閑。長望杳難見。浮雲橫遠山。

金門答蘇秀才

君還石門日。朱火始物木。春草如有情。山中尙含綠。折芳媿遙憶。永路當自勗。遠見故人心。平生以此足。巨海納百川。麟閣多才賢。獻書入金闕。酌醴奉瓊筵。屢忝白雲唱。恭聞黃竹篇。恩光照拙薄。

雲漢希騰遷。銘鼎儻云遂。扁舟方渺然。我留在金門。君去臥丹壑。未果三山期。遙欣一邱樂。玄珠寄罔象。赤水非寥廓。願狎東海鷗。共營西山藥。栖巖君寂滅。處世余龍蠖。良辰不同賞。永日應閑居。鳥吟簷間樹。花落窗下書。綠谿見綠篠。隔岫窺紅蕖。採薇行笑歌。眷我情何已。月出石鏡間。松鳴風琴裏。得心自虛妙。外物空頽靡。身世如兩忘。從君老烟水。

誦坊州王司馬與閣正字對雪見贈

遊子東南來。自宛適京國。飄然無心雲。倏忽復西北。訪戴昔未偶。遊嵇此相得。愁顏發新歡。終宴叙前識。閣公漢庭舊。沉鬱富才力。價重銅龍樓。聲高重門側。寧期此相遇。華館倍遊息。積雪明遠峯。寒城鎖春色。主人蒼生望。假我青雲翼。風水如見資。投筭佐皇極。

## 誄中都小吏携斗酒雙魚于逆旅見贈

魯酒若琥珀。汶魚紫錦鱗。山東豪吏有俊氣。手携此物贈遠人。意氣相傾兩相顧。斗酒雙魚表情素。雙鯉呀呷鯖蠶張。跋刺銀盤欲飛去。呼兒拂机霜刃揮。紅肥花落白雪霏。爲君下筯一餐飽。醉著金鞍上馬歸。

## 誄張卿夜宿南陵見贈

月出魯城東。明如天上雪。魯女驚莎雞。鳴機應秋節。當君相思夜。火落金風高。河漢挂戶牖。欲濟無輕舠。我昔辭林邱。雲龍忽相見。客星動太微。朝去洛陽殿。爾來得茂彥。七葉仕漢餘。身爲下邳客。家有圯橋書。傳說未夢時。終當起巖野。萬古騎辰星。光輝照天下。與君各未遇。長策委蒿萊。寶刀隱玉匣。繡澁空莓苔。遂令世上愚。

輕我士與灰。一朝攀龍去。蠹黽安在哉。故山定有酒。與爾傾金罍。  
· 酬岑勛見尋就元丹邱對酒相待以詩見招

黃鶴東南來。寄書寫心曲。倚松開其緘。憶我腸斷續。不以千里遙。  
命駕來相招。中逢元丹邱。登嶺宴碧霄。對酒忽思我。長嘯臨清飈。  
蹇余未相知。茫茫綠雲垂。俄然素書及。解此長渴飢。策馬望山月。  
途窮造堦墀。喜茲一會面。若覩瓊樹枝。憶君我遠來。我歡方速至。  
開顏酌美酒。樂極忽成醉。我情既不淺。君意方亦深。相知兩相得。  
一顧輕千金。且向山客笑。與君論素心。

答從弟幼成過西園見贈

一身自瀟洒。萬物何囂誼。拙薄謝明時。棲閑歸故園。二季過舊壑。  
四鄰馳華軒。衣劍照松宇。賓徒光石門。山童薦珍果。野老開芳樽。

上陳樵漁事。下敘農圃言。昨來荷花滿。今天蘭苕繁。一笑復一歌。不知夕景昏。醉罷同所樂。此情難具陳。

訓王補闕惠莊廟宋丞泚贈別

學道三十春。自言羲皇人。軒蓋宛若夢。雲松長相親。偶將二公合。復與三山鄰。喜結海上契。自爲天外賓。鸞翻我先鑿。龍性君莫馴。朴散不尙古。時訛皆失真。勿踏荒溪波。竭來浩然津。薜帶何辭楚。桃源堪避秦。世迫且離別。心在期隱淪。訓贈非烟誠。永言銘佩紳。

訓裴侍御對雨感時見贈

雨色秋來寒。風嚴清江爽。孤高繡衣人。蕭灑青霞賞。平生多感激。忠義非外獎。禍連積怨生。事及徂川往。楚邦有壯士。鄢郢翻掃蕩。申包哭秦庭。泣血將安仰。鞭尸辱已及。堂上羅宿莽。頗似今之人。

蝨賊陷忠讜。渺然一水隔。何由稅歸鞅。日夕聽猿愁。懷賢盈夢想。

贈李十二

攝監察御史崔成甫附

我是瀟湘放逐臣。君辭明主漢江濱。天外常求太白老。金陵捉得酒仙人。

詠崔侍御

嚴陵不從萬乘遊。歸臥空山釣碧流。自是客星辭帝坐。元非太白醉揚州。

翫月金陵城西孫楚酒樓達曙歌吹日晚乘醉著紫綺裘烏紗巾與酒客數人棹歌秦淮往石頭訪崔四侍御

昨翫西城月。青天垂玉鈎。朝沽金陵酒。歌吹孫楚樓。忽憶繡衣人。乘船往石頭。草裏烏紗巾。倒披紫綺裘。兩岸拍手笑。疑是王子猷。

酒客十數公。崩騰醉中流。謔浪掉海客。喧呼傲陽侯。半道逢吳姬。卷簾出揶揄。我憶君到此。不知狂與羞。月下一見君。三杯便迴橈。捨舟共連袂。行上南渡橋。興發歌綠水。秦客爲之搖。雞鳴復相招。清宴逸雲霄。贈我數百字。百字凌風飄。擊之衣裘上。相憶每長謠。

江上答崔宣城

太華三芙蓉。明星玉女峯。尋仙下西岳。陶令忽相逢。問我將何事。湍波歷幾重。貂裘非季子。鶴氅仰王恭。謬忝燕臺召。而陪郭隗蹤。水流知入海。雲去或從龍。樹繞蘆洲月。山鳴鵲鎮鐘。還期如可訪。台嶺蔭長松。

答族姪僧中孚贈玉泉仙人掌茶并序

余聞荊州玉泉寺近清溪諸山山洞往往有乳窟。窟中多玉泉交流。其



中有白蝙蝠。大如鴉。按仙經。蝙蝠一名仙鼠。千歲之後。體白如雪。棲則倒懸。蓋飲乳水而長生也。其水邊處處有茗草羅生。枝葉如碧玉。惟玉泉真公常采而飲之。年八十餘歲。顏色如桃花。而此茗清香滑熟。異於他者。所以能還童振枯。扶人壽也。余遊金陵。見宗僧中孚。示余茶數十片。拳然重疊。其狀如手。號爲仙人掌茶。蓋新出乎玉泉之山。曠古未覩。因持之見遺。兼贈詩。要余答之。遂有此作。後之高僧大隱。知仙人掌茶。發乎中孚禪子及青連居士李白也。

常聞玉泉山。山洞多乳窟。仙鼠如白鴉。倒懸清溪月。茗生此中石。玉泉流不歇。根柯灑芳津。採服潤肌骨。叢老卷綠葉。枝枝相接連。曝成仙人掌。似拍洪崖肩。舉世未見之。其名定誰傳。宗英乃禪伯。

投贈有佳篇。清鏡燭無鹽。顧慙西子妍。朝坐有餘興。長吟播諸天。

誄裴侍御留岫師彈琴見寄

君同鮑明遠，邀彼休上人。鼓琴亂白雪。秋變江上春。瑤草綠未衰。攀翻寄情親。相思兩不見。流淚空盈巾。

張相公出鎮荊州尋除太子詹事余時流夜郎行至江夏與張公相去千里公因太府丞王昔使車寄羅衣二事及五月五日贈余詩余答以

此詩

張衡殊不樂。應有四愁詩。慙君錦繡段。贈我慰相思。鴻鵠復矯翼。鳳凰憶故池。榮樂一如此。商山老紫芝。

醉後答丁十八以詩譏予搥碎黃鶴樓

黃鶴高樓已搥碎。黃鶴仙人無所依。黃鶴上天訴玉帝。却放黃鶴江南

歸。神明太守再雕飾。新圖粉壁還芳菲。一州笑我爲狂客。少年往往來相譏。君平簾下誰家子。云是遼東丁令威。作詩調我驚逸興。白雲遶筆窗前飛。待取明朝酒醒罷。與君爛熳尋春暉。

答裴侍御先行至石頭驛以書見招期月滿泛洞庭

君至石頭驛。寄書黃鶴樓。開緘識遠意。速此南行舟。風水無定準。湍波或滯留。憶昨新月生。西簷若瓊鈎。今來何所似。破鏡懸清秋。恨不三五明。平湖泛澄流。此歡竟莫遂。狂殺王子猷。巴陵定近遠。持贈解人憂。

答高山人兼呈權顧二侯

虹霓掩天光。哲后起康濟。應運生夔龍。開元掃氛翳。太微廓金鏡。端拱清遐裔。輕塵集嵩岳。虛點盛明意。謬揮紫泥詔。獻納青雲際。

讒惑英主心。恩疏佞臣計。徬徨庭闕下。歎息光陰逝。未作仲宣詩。先流賈生涕。挂帆秋江上。不爲雲羅制。山海向東傾。百川無盡勢。我於鷗夷子。相去千餘歲。運闊英發稀。同風遙執袂。發鱸望遠水。忽見滄浪柂。高士何處來。虛舟渺安繫。衣貌本淳古。文章多佳麗。延引故鄉人。風義未淪替。顧侯達語默。權子識通蔽。曾是無心雲。俱爲此留滯。雙萍易飄轉。獨鶴思凌厲。明晨去瀟湘。共謁蒼梧帝。

答杜秀才五松山見贈

昔獻長楊賦。天開雲南歡。當時待詔承明裏。皆道楊雄才可觀。勅賜飛龍二天馬。黃金絡頭白玉鞍。浮雲蔽日去不返。總爲秋風摧紫蘭。角巾東出商山道。採秀行歌咏芝草。路逢園綺笑向人。兩君解來一何好。聞道金陵龍虎盤。還同謝朓望長安。千峯夾水向秋浦。五松名山

當夏寒。銅井炎爐敲九天。赫如鑄鼎荆山前。陶公矍鑠呵赤電。回祿  
睚眦揚紫烟。此中豈是久留處。便欲燒丹從列仙。愛聽松風且高臥。  
颼颼吹盡炎氛過。登崖獨立望九州。陽春欲奏誰相和。聞君往年游錦  
城。章仇尙書到屣迎。飛牋絡繹奏明主。天書降問迴恩榮。骯髒不能  
就珪組。至今空揚高蹈名。夫子工文絕世奇。五松新作天下推。吾非  
謝尙邀彥伯。異代風流各一時。一時相逢樂在今。袖拂白雲開素琴。  
彈爲三峽流泉音。從茲一別武陵去。去後挑花春水深。

至陵陽山登天柱石酬韓侍御見招隱黃山。

韓衆騎白鹿。西往華山中。玉女千餘人。相隨在雲空。見我傳祕訣。  
精誠與天通。何意到陵陽。游目送飛鴻。天子昔避狄。與君亦乘驄。  
擁兵五陵下。長策馭胡戎。時秦解繡衣。脫身若飛篷。鸞鳳翻羽翼。

啄粟坐樊籠。海鶴一笑之。思歸向遼東。黃山過石柱。巖罅上攢叢。  
因巢翠玉樹。急見浮邱公。又引王子喬。吹笙舞松風。朗咏紫霞篇。  
請開堯珠宮。步綱繞碧落。倚樹招青童。何日可携手。遺形入無窮。

詠崔十五見招

爾有鳥跡書。相招琴溪飲。手跡尺素中。如天落雲錦。讀罷向空笑。  
疑君在我前。長吟字不滅。懷袖且三年。

答王十二寒夜獨酌有懷

昨夜吳中雪。子猷佳興發。萬里浮雲卷碧山。青天中道流孤月。孤月  
滄浪河漢清。北斗錯落長庚明。懷余對酒夜霜白。玉牀金井冰崢嶸。  
人生飄忽百年內。且須酣暢萬古情。君不能狸膏金距學鬪雞。坐令鼻  
息吹虹霓。君不能學哥舒橫行青海夜帶刀。西屠石堡取紫袍。吟詩作

賦北窗裏。萬言不直一杯水。世人聞此皆掉頭。有如東風射馬耳。魚目亦笑我。請與明月同。驂騮拳跼不能食。蹇驢得志鳴春風。折楊黃華合流俗。晉君聽琴枉清角。巴人誰肯和陽春。楚地猶來賤奇璞。黃金散盡交不成。白首爲儒身被輕。一談一笑失顏色。蒼蠅貝錦喧謗聲。曾參豈是殺人者。讒言三及慈母驚。與君論心握君手。榮辱於余亦何有。孔聖猶聞傷鳳麟。董龍更是何雞狗。一生傲岸苦不諧。恩疎媒勞志多乖。嚴陵高揖漢天子。何必長劍挂頤事玉階。達亦不足貴。窮亦不足悲。韓信羞將絳灌比。襮衡恥逐屠沽兒。君不見李北海。英風豪氣今何在。君不見裴尙書。土墳三尺蒿棘居。少年早欲五湖去。見此彌將鐘鼎疎。

古近體詩共六十首

遊南陽白水登石激作

朝涉白水源。暫與人俗疎。島嶼佳境色。江天涵清虛。目送去海雲。心閑游川魚。長歌盡落日。乘月歸田廬。

遊南陽清冷泉

惜彼落日暮。愛此寒泉清。西輝逐流水。蕩漾游子情。空歌望雲月。曲盡長松聲。

尋魯城北范居士失道落蒼耳中見范置酒摘蒼耳作

雁度秋色遠。日靜無雲時。客心不自得。浩漫將何之。忽憶范野人。閑園養幽姿。茫然起逸興。但恐行來遲。城壕失形路。馬首迷荒陂。不惜翠雲裘。遂爲蒼耳欺。入門且一笑。把臂君爲誰。酒客愛秋蔬。山盤薦霜梨。他筵不下筯。此席忘朝飢。酸棗垂北郭。寒瓜蔓東籬。



還傾四五酌。自詠猛虎詞。近作十日歡。遠爲千載期。風流自簸蕩。謔浪偏相宜。酣來上馬去。却笑高陽池。

東魯門泛舟二首

日落沙明天倒開。波搖石動水縈迴。輕舟泛月尋溪轉。疑是山陰雪後來。

其二

水作青龍盤石隄。桃花夾岸魯門西。若教月下乘舟去。何啻風流到剡溪。

秋獵孟諸夜歸置酒單父東樓觀妓

傾暉速短炬。走海無停川。冀餐圓邱草。欲以還頽年。此事不可得。微生若浮烟。駿發跨名駒。雕弓控鳴弦。鷹豪魯草白。孤兔多肥鮮。

邀遮相馳逐。遂出城東田。一掃四野空。喧呼鞍馬前。歸來獻所獲。炮炙宜霜天。出舞兩美人。飄飄若雲仙。留歡不知疲。清曉方來旋。

遊太山六首

四月上太山。石平御道開。六龍過萬壑。澗谷隨縈迴。馬跡遶碧峯。於今滿青苔。飛流灑絕巘。水急松聲哀。北眺嶢嶂奇。傾崖向東摧。洞門閉石扇。地底興雲雷。登高望蓬瀛。想象金銀臺。天門一長嘯。萬里清風來。玉女四五人。飄飄下九垓。含笑引素手。遺我流霞杯。稽首再拜之。自媿非仙才。曠然小宇宙。棄世何悠哉。

其二

清曉騎白鹿。直下天門山。山際逢羽人。方瞳好容顏。捫蘿欲就語。却掩青雲關。遺我烏跡書。飄然落巖間。其字乃上古。讀之了不閑。

感此三嘆息。從師方未還。

其三

平明登日觀。舉手開雲關。精神四飛揚。如出天地間。黃河從西來。窈窕入遠山。憑崖覽八極。目盡長空閑。偶然值青童。綠髮雙雲鬟。笑我晚學仙。蹉跎凋朱顏。躊躇忽不見。浩蕩難追攀。

其四

清齋三千日。裂素寫道經。吟誦有所得。衆神衛我形。雲行信長風。颯若羽翼生。攀崖上日觀。伏檻窺東溟。海色動遠山。天雞已先鳴。銀臺出倒景。白浪翻長鯨。安得不死藥。高飛向蓬瀛。

其五

日觀東北傾。兩崖夾雙石。海水落眼前。天光遙空碧。千峯爭攢聚。

萬壑絕凌歷。緬彼鶴上仙。去無雲中跡。長松入霄漢。遠望不盈尺。  
山花異人間。五月雪中白。終當遇安期。於此鍊玉液。

其六

朝飲王母池。暝投天門關。獨抱緣綺琴。夜行青山間。山明月露白。  
夜靜松風歇。仙人遊碧峯。處處笙歌發。寂靜娛清輝。玉真連翠微。  
想象鸞鳳舞。飄颻龍虎衣。捫天摘匏瓜。恍惚不憶歸。原手弄清淺。  
誤攀織女機。明晨坐相失。但見五雲飛。

秋夜與劉碭山泛宴喜亭池

明宰試舟楫。張燈宴華池。文招梁苑客。歌動郢中兒。月色望不盡。  
空天交相宜。令人欲泛海。只待長風吹。

攜妓登梁王棲霞山孟氏桃園中

碧草已滿地。柳與梅爭春。謝公自有東山妓。金屏笑生如花人。今日非昨日。明日還復來。白髮對綠酒。強歌心已摧。君不見梁王池上月。昔照梁王樽酒中。梁王已去明月在。黃鸝愁醉啼春風。分明感激眼前事。莫惜醉臥桃園東。

與從姪杭州刺史良遊天竺寺

挂席凌蓬邱。觀濤憩樟樓。三山動逸興。五馬同遨遊。天竺森在眼。松風颯驚秋。覽雲測變化。弄水窮清幽。疊嶂隔遙海。當軒寫歸流。詩成傲雲月。佳趣滿吳洲。

同友人舟行

楚臣傷江楓。謝客拾海月。懷沙去瀟湘。挂席泛冥渤。塞子訪前跡。獨往造窮髮。古人不可攀。去若浮雲沒。願言弄倒景。從此鍊真骨。

華頂窺絕冥。蓬壺望超忽。不知青春度。但怪綠芳歇。空持釣鰲心。從此謝魏闕。

下終南山過山斛斯山人宿置酒

暮從碧山下。山月隨人歸。却顧所來徑。蒼蒼橫翠微。相携及田家。童稚開荆扉。綠竹入幽徑。青羅拂行衣。歡言得所憩。美酒聊共揮。長歌吟松風。曲盡河星稀。我醉君復樂。陶然共忘機。

朝下過盧郎中敝舊遊

君登金華省。我入銀臺門。幸遇聖明主。俱承雲雨恩。復此休浣時。閑爲疇昔言。卻話山海事。宛然林壑存。明湖思曉月。疊嶂憶清猿。何由返初服。田野醉芳樽。

侍從遊宿溫泉宮作。

羽林十二將。羅列應星文。霜仗懸秋月。霓旌卷夜雲。嚴更千戶肅。清樂九天聞。日出瞻佳氣。蔥蔥繞聖君。

邯鄲南亭觀妓

歌鼓燕趙兒。魏姝弄鳴絲。粉色艷日彩。舞袖拂花枝。把酒領美人。請歌邯鄲詞。清箏何繚繞。度曲綠雲垂。平原君安在。科斗生古池。座客三千人。於今知有誰。我輩不作樂。但爲後代悲。

春日遊羅敷潭

行歌入谷口。路盡無人躋。攀崖度絕壑。弄水尋迥溪。雲從石上起。客到花間迷。淹留未盡興。日落羣峯西。

春陪商州裴使君遊石娥溪

裴公有仙標。拔俗數千丈。澹蕩滄洲雲。飄飄紫霞想。剖竹商洛間。

政成心已閑。蕭條出世表。冥寂閉玄關。我來屬芳節。解榻時相悅。褰帷對雲峯。揚袂指松雪。暫出東城邊。遂遊西巖前。橫天聳翠壁。噴壑鳴紅泉。尋幽殊未歇。愛此春光發。溪傍饒名花。石上有好月。命駕歸去來。露華生翠苔。淹留惜將晚。復聽清猿哀。清猿斷人腸。遊子思故鄉。明發首東路。此歡焉可忘。

陪從祖濟南太守泛鵲山湖三首

初謂鵲山近。寧知湖水遙。此行殊訪戴。自可緩歸橈。

其二

湖闊數十里。湖光搖碧山。湖西正有月。獨送李膺還。

其三

水入北湖去。舟從南浦回。遙看鵲山轉。却似送人來。



## 春日陪楊江寧及諸官宴北湖感古作

昔聞顏光祿。攀龍宴京湖。樓船入天鏡。帳殿開雲衢。君王歌大風。  
如樂豐沛都。延年獻佳作。邈與詩人俱。我來不及此。獨立鍾山孤。  
楊宰穆清風。芳聲騰海隅。英僚滿四座。粲若瓊林敷。鷄首弄倒景。  
蛾眉綴明珠。新絃採梨園。古舞嬌吳歛。曲度繞雲漢。聽者皆歡娛。  
雞棲何嘈嘈。汾月沸笙竽。古之帝宮苑。今乃人樵蘇。感此勸一觴。  
願君覆瓢壺。榮盛當作樂。無令後賢吁。

## 宴鄭參卿山池

爾恐碧草晚。我畏朱顏移。愁看楊花飛。置酒正相宜。歌聲送落日。  
舞影迴清池。令夕不盡杯。留歡更邀誰。

## 遊謝氏山亭

淪老臥江海。再歡天地清。病閑久寂寞。歲物徒芬榮。借君西池遊。聊以散我情。掃雪松下去。捫蘿石道行。謝公池塘上。春草颯已生。花枝拂人來。山鳥向我鳴。田家有美酒。落日與之傾。醉罷弄歸月。遙欣稚子迎。

把酒問月

青天有月來幾時。我今停杯一問之。人攀明月不可得。月行却與人相隨。皎如飛鏡臨丹闕。綠烟滅盡清耀發。但見宵從海上來。寧知曉向雲間沒。白兔擣藥秋復春。嫦娥孤棲與誰鄰。今人不見古時月。今月曾經照古人。古人今人若流水。共看明月皆如此。唯願當歌對酒時。月光長照金樽裏。

同族姪評事黯遊昌禪師山池二首

遠公愛康樂。爲我開禪關。蕭然松石下。何異清涼山。花將色不染。水與心俱閑。坐度小劫。觀空天地間。

其二

客來花雨際。秋水落金池。片石寒青錦。疎楊挂綠絲。高僧拂玉柄。童子獻雙梨。惜去愛佳景。烟蘿欲暝時。

金陵鳳凰臺置酒

置酒延落景。金陵鳳凰臺。長波寫萬古。心與雲俱開。借問往昔時。鳳凰爲誰來。鳳凰去已久。正當今日迴。明君越羲軒。天老坐三台。豪士無所用。彈絃醉金罍。東風吹山花。安可不盡杯。六布沒幽草。深宮冥綠苔。置酒勿復道。歌鍾但相催。

秋浦清溪雪夜對酒客有唱鷓鴣者

披君貂襜褕。對君白玉壺。雪花酒上滅。頓覺夜寒無。客有桂陽至。能吟山鷓鴣。清風動窗竹。越鳥起相呼。持此足爲樂。何煩笙與竽。

與周剛清溪玉鏡潭宴別

康樂上官去。永嘉遊石門。江亭有孤嶼。千載跡猶存。我來遊秋浦。三入桃陂源。千峯照積雪。萬壑盡啼猿。興與謝公合。文因周子論。掃崖去落葉。席月開清樽。溪當大樓南。溪水正南奔。迴作玉鏡潭。澄明洗心魂。此中得佳境。可以絕囂喧。清夜方歸來。酣歌出平原。別後經此地。爲予謝蘭蓀。

遊秋浦白筍陂二首

何處夜行好。月明白筍陂。山光搖積雪。猿影挂寒枝。但恐佳景晚。小令歸棹移。人來有清興。及此有相思。

其二

白笥夜長嘯。爽然溪谷寒。魚龍動陂水。處處生波瀾。天借一明月。飛來碧雲端。故鄉不可見。腸斷正西看。

宴陶家亭子

曲巷幽人宅。高門大士家。池開照膽鏡。林吐破顏花。綠水藏春日。青軒祕晚霞。若聞絃管妙。金谷不能誇。

在水軍宴韋司馬樓船觀妓

搖曳帆在空。清流順歸風。詩因鼓吹發。酒爲劍歌雄。對舞青樓妓。雙鬟白玉童。行雲且莫去。留醉楚王宮。

流夜郎至江夏陪長史叔及薛明府宴興德寺南閣

紺殿橫江上。青山落鏡中。岸迴沙不盡。日映水成空。天樂流香閣。

蓮舟颺晚風。恭陪竹林宴。留醉與陶公。

泛沔州城南郎官湖并序

乾元歲秋八月。白遷於夜郎。遇故人尙書郎張謂出使夏口。沔州牧杜公。漢陽宰王公。觴於江城之南湖。樂天下之再平也。方夜水月如練。清光可掇。張公殊有勝概。四望超然。乃顧白曰。此湖古來賢豪遊者非一。而枉踐佳景。寂寥無聞。夫子可爲我標之嘉名。以傳不朽。白因舉酒酌水。號之曰郎官湖。亦由鄭圃之有僕射陂也。席上文士輔翼岑靜以爲知言。乃命賦詩紀事。刻石湖側。將與大別山共相磨滅焉。

張公多逸興。共泛沔城隅。當時秋月好。不減武昌都。四坐醉清光。爲歡古來無。郎官愛此水。因號郎官湖。風流若未減。名與此山俱。

陪侍郎叔遊洞庭醉後三首

今日竹林宴。我家賢侍郎。三杯容小阮。醉後發清狂。

其二

船上齊橈樂。湖心泛月歸。白鷗閑不去。爭拂酒筵飛。

其三

剗却君山好。平鋪湘水流。巴陵無限酒。醉殺洞庭秋。

夜泛洞庭尋裴侍御清酌

日晚湘水綠。孤舟無端倪。明湖漲秋月。獨泛巴陵西。遇憩裴逸人。巖居陵丹梯。抱琴出深竹。爲我彈鷓雞。曲盡酒亦傾。北窗醉如泥。人生且行樂。何必組與珪。

陪族叔刑部侍郎曄及中書賈舍人至遊洞庭五首

洞庭西望楚江分。水盡南天不見雲。日落長沙秋色遠。不知何處弔湘君。

其二

南湖秋水夜無煙。耐可乘流直上天。且就洞庭賒月色。將船買酒白雲邊。

其三

洛陽才子謫湘川。元禮同舟月下仙。記得長安還欲笑。不知何處是西天。

其四

洞庭湖西秋月輝。瀟湘江北早鴻飛。醉客湖船歌白苧。不知霜露入秋衣。



其五

帝子瀟湘去不還。空餘秋草洞庭間。淡掃明湖開玉鏡。丹青畫出是君山。

楚江黃龍磯南宴楊執戟治樓

五月分五洲。碧山對青樓。故人楊執戟。春賞楚江流。一見醉漂月。三杯歌棹謳。桂枝攀不盡。他日更相求。

銅官山醉後絕句

我愛銅官樂。千年未擬還。要須迴舞袖。拂盡五松山。

與南陵常贊府遊五松山

安石泛溟渤。獨嘯長風還。逸韻動海上。高情出人間。靈異可並跡。澹然與世閑。我來五松下。置酒窮躋攀。徵古絕遺老。因名五松山。

五松何清幽。勝境美沃洲。蕭颯鳴洞壑。終年風雨秋。響入百泉去。聽如三峽流。剪竹掃天花。且從傲吏遊。龍堂若可憩。吾欲歸精修。

宣城清溪

清溪勝桐廬。水木有佳色。山貌日高古。石容天傾側。綵鳥昔未名。白猿初相識。不見同懷人。對之空嘆息。

與謝良輔遊涇川陵巖寺

乘君素舸泛涇西。宛似雲門對若溪。且從康樂尋山水。何必東遊入會稽。

遊水西簡鄭明府

天宮水西寺。雲錦照東郭。清湍鳴迴溪。綠竹遶飛閣。涼風日瀟灑。幽客時憩泊。五月思貂裘。謂言秋霜落。石蘿引古蔓。岸笋開新籜。

吟翫空復情。相思爾佳作。鄭公詩人秀。逸韻宏寥廓。何當一來遊。  
愜我雪山諾。

九日登山

淵明歸去來。不與世相逐。爲無杯中物。遂偶本州牧。因招白衣人。  
笑酌黃花菊。我來不得意。虛過重陽時。題輿何俊發。遂結城南期。  
築土接響山。俯臨宛水湄。胡人叫玉笛。越女彈霜絲。自作英王胄。  
斯樂不可窺。赤鯉湧琴高。白龜道冰夷。靈仙如彷彿。奠醑遙相知。  
古來登高人。今復幾人在。滄洲違宿諾。明日猶可待。連山似驚波。  
合沓出溟海。揚袂揮四座。酩酊安所知。齊歌送清觴。起舞亂參差。  
賓隨落葉散。帽逐秋風吹。別後登此臺。願言長相思。

九日

今日雲景好。水綠秋山明。携壺酌流霞。搴菊泛寒榮。地遠松石古。風揚絃管清。窺觴照歡顏。獨笑還自傾。落帽醉山月。空歌懷友生。

九日龍山飲

九日龍山飲。黃花笑逐臣。醉看風落帽。舞愛月留人。

九月十日卽事

昨日登高罷。今朝更舉觴。菊花何太苦。遭此兩重陽。

陪族叔當塗宰遊化城寺升公清風亭

化城若化出。金榜天宮開。疑是海上雲。飛空結樓臺。升公湖上秀。粲然有辯才。濟人不利己。立俗無嫌猜。了見水中月。青蓮出塵埃。閒居清風亭。左右清風來。當暑陰廣殿。太陽爲徘徊。茗酌待幽客。珍盤薦彫梅。飛文何灑落。萬象爲之摧。季父擁鳴琴。德聲布雲雷。

雖游道林室。亦舉陶潛杯。清樂動諸天。長松自吟哀。留歡若可盡。劫石乃成灰。

□古近體詩共三十六首□

登錦城散花樓

日照錦城頭。朝光散花樓。金窗夾繡戶。珠箔懸銀鉤。飛梯綠雲中。極目散我憂。暮雨向三峽。春江繞雙流。今來一登望。如上九天遊。

登峨眉山

蜀國多仙山。峨眉邈難匹。周流試登覽。絕怪安可悉。青冥倚天開。彩錯疑畫出。冷然紫霞賞。果得錦囊術。雲間吟瓊簫。石上弄寶瑟。平生有微尚。歡笑自此畢。烟容如在顏。塵累忽相失。儻逢騎羊子。携手凌白日。

大庭庫

朝登大庭庫。雲物何蒼然。莫辨陳鄭火。空霾鄒魯烟。我來尋梓慎。觀化入寥天。古木翔氣多。松風如五絃。帝圖終冥沒。嘆息滿山川。

登單父陶少府半月臺

陶公有逸興。不與常人俱。築臺像半月。迥向高城隅。置酒望白雲。商飈起寒梧。秋山入遠海。桑柘羅平蕪。水色淥且明。令人思鏡湖。終當過江去。愛此暫踟蹰。

天台曉望

天台鄰四明。華頂高百越。門標赤城霞。樓棲滄島月。憑高遠登覽。直下見溟渤。雲垂大鵬翻。波動巨鰲沒。風潮爭洶湧。神怪何翕忽。觀奇跡無倪。好道心不歇。攀條摘朱實。服藥鍊金骨。安得生羽毛。

千春臥蓬闕。

早望海霞邊

四明三千里。朝起赤城霞。日出紅光散。分耀照雪崖。一餐咽瓊液。五內發金沙。舉手何所待。青龍白虎車。

焦山望松寥山

石壁望松寥。宛然在碧霄。安得五綵虹。架天作長橋。仙人如愛我。舉手來相招。

杜陵絕句

南登杜陵上。北望五陵間。秋水明落日。流光滅遠山。

登太白峯

西上太白峯。夕陽窮登攀。太白與我語。爲我開天關。願乘冷風去。

直出浮雲間。舉手可近月。前行若無山。一別武功去。何時復更還。  
登邯鄲洪波臺置酒觀發兵

我把兩赤羽。來遊燕趙間。天狼正可射。感激無時閑。觀兵洪波臺。  
倚劍望玉關。請纓不繫越。且向燕然山。風引龍虎旗。歌鐘昔追攀。  
繫筑落高月。投壺破愁顏。遙知百戰勝。定掃鬼方還。

登新平樓

去國登茲樓。懷歸傷暮秋。天長落日遠。水淨寒波流。秦雲起嶺樹。  
胡鴈飛沙洲。蒼蒼幾萬里。目極令人愁。

謁老君廟

先君懷聖德。靈廟肅神心。草合人蹤斷。塵濃鳥跡深。流沙丹竈滅。  
關路紫烟沉。獨傷千載後。空餘松柏林。



## 秋日登揚州西靈塔

寶培凌蒼蒼。登攀覽四荒。頂高元氣合。標出海雲長。萬象分天界。三天接畫梁。水搖金剎影。日動火珠光。鳥拂瓊簷度。霞逾繡栱張。目隨征路斷。心逐去帆揚。露浩梧楸白。霜催橘柚黃。玉毫如可見。於此照迷方。

## 登金陵冶城西北謝安墩

晉室昔橫潰。永嘉遂南奔。沙塵何茫茫。龍虎鬪朝昏。胡馬風漢草。天驕蹙中原。哲匠感頹運。雲鵬忽飛翻。組練照楚國。旌旗連海門。西秦百萬衆。戈甲如雲屯。投鞭可填江。一掃不足論。皇運有返正。醜虜無遺魂。談笑遏橫流。蒼生望斯存。冶城訪古跡。猶有謝安墩。憑覽周地險。高標絕人喧。想像東山姿。緬懷右軍言。梧桐識嘉樹。

蕙草留芳根。白鷺映春洲。青龍見朝暎。地古雲物在。臺傾禾黍繁。我來酌清波。於此樹名園。功成拂衣去。歸入武陵源。

登瓦官閣

晨登瓦官閣。極眺金陵城。鍾山對北戶。淮水入南榮。漫漫雨花落。嘈嘈天樂鳴。兩廊振法鼓。四角吟風箏。杳出霄漢上。仰攀日月行。山空羈氣滅。地古寒陰生。寥廓雲海晚。蒼茫宮觀平。門餘闔闔字。樓識鳳凰名。雷作百山動。神扶萬栱傾。靈光何足貴。長此鎮吳京。

登梅崗望金陵贈族姪高座寺僧中孚

鍾山抱金陵。霸氣昔騰發。天開帝王居。海色照宮闕。羣峯如逐鹿。奔走相馳突。江水九道來。雲端遙明沒。時遷大運去。龍虎勢休歇。我來屬天清。登覽窮楚越。吾宗挺禪伯。特秀鸞鳳骨。衆星羅青天。

明者獨有月。冥居順生理。草木不翦伐。烟窗引薔薇。石壁老野蕨。吳風謝安屐。白足傲履屨。幾宿一下山。蕭然忘干謁。談經演金偈。降鶴舞海雪。時聞天香來。了與世事絕。佳遊不可得。春去惜遠別。賦詩留巖屏。千載庶不滅。

登金陵鳳凰臺

鳳凰臺上鳳凰遊。鳳去臺空江自流。吳宮花草埋幽徑。晉代衣冠成古邱。三山半落青天外。一水中分白鷺洲。總爲浮雲能蔽日。長安不見使人愁。

望廬山瀑布二首

西登香爐峯。南見瀑布水。挂流三百丈。噴壑數十里。歛如飛電來。隱若白虹起。初驚河漢落。半灑雲天裏。仰觀勢轉雄。壯哉造化功。

海風吹不斷。江月照還空。空中亂深射。左右洗清壁。飛珠散輕霞。流沫沸穹石。而我樂名山。對之心益閑。無論漱瓊液。且得洗塵顏。且諧宿所好。永願辭人間。

其二

日照香爐生紫煙。遙看瀑布挂前川。飛流直下三千尺。疑是銀河落九天。

望廬山五老峯

廬山東南五老峯。青天削出金芙蓉。九江秀色可攬結。吾將此地巢雲松。

江上望皖公山

奇峯出奇雲。秀木含秀氣。清宴皖公川。巉絕稱人意。獨遊滄江上。

終日淡無味。但愛茲嶺高。何由討靈異。默然遙相許。欲往心莫遂。待吾還丹成。投跡歸此地。

### 望黃鶴山

東望黃鶴山。雄雄半空出。四面生白雲。中峯倚紅日。巖巒行穹跨。峯嶂亦冥密。頗聞列仙人。於此學飛術。一朝向蓬海。千載空石室。金籠生煙埃。玉潭祕清謐。地古遺草木。庭寒老芝朮。蹇余羨攀躋。因欲保閑逸。觀奇徧諸岳。茲嶺不可匹。結心寄青松。永悟客情畢。

### 鸚鵡洲

鸚鵡來過吳江水。江上洲傳鸚鵡名。鸚鵡西飛隴山去。芳洲之樹何青青。烟開蘭葉香風暖。岸夾桃花錦浪生。遷客此時徒極目。長洲孤月向誰明。

## 九日登巴陵置酒望洞庭水軍

九日天氣清。登高無秋雲。造化闢川岳。了然楚漢分。長風鼓橫波。合沓蹙龍文。憶昔傳遊豫。樓船壯橫汾。今茲討鯨鯢。旌旆何繽紛。白羽落酒樽。洞庭羅三軍。黃花不撥手。戰鼓遙相聞。劍舞轉頽陽。當時日停曛。酣歌激壯士。可以摧妖氛。握齏東籬下。淵明不足羣。

## 秋登巴陵望洞庭

清晨登巴陵。周覽無不極。明湖映天光。徹底見秋色。秋色何蒼然。際海俱澄鮮。山青滅遠樹。水綠無寒烟。來帆出江中。去鳥向日邊。風清長沙浦。霜空雲夢田。瞻光惜頽髮。閱水悲徂年。北渚旣蕩漾。東流自潺湲。郢人唱白雪。越女歌採蓮。聽此更腸斷。憑崖淚如泉。

## 與夏十二登岳陽樓

樓觀岳陽盡。川迴洞庭開。雁引愁心去。山銜好月來。雲間連下榻。天上接行杯。醉後涼風起。吹人舞袖迴。

登巴陵開元寺西閣贈衡岳僧方外

衡岳有開士。五峯秀眞骨。見君萬里心。海水照秋月。大臣南溟去。問道皆請謁。洒以甘露言。清涼潤肌髮。明湖落天鏡。香閣凌銀闕。登眺餐惠風。新花期啓發。

與賈至舍人於龍興寺剪落梧桐枝望瀘湖

翦落青梧枝。瀘湖坐可窺。雨洗秋山淨。林光澹碧滋。水閑明鏡轉。雲繞畫屏移。千古風流事。名賢共此時。

挂席江上待月有懷

待月月未出。望江江自流。倏忽城西郭。青天懸玉鈎。素華雖可攬。

清景不同遊。耿耿金波裏。空瞻鵝鵲樓。

金陵望漢江

漢江迴萬里。派作九龍盤。橫潰豁中國。崔嵬飛迅湍。六帝淪亡後。三吳不足觀。我君混區宇。垂拱衆流安。今日任公子。滄浪罷釣竿。

秋登宣城謝眺北樓

江城如畫裏。山晚望晴空。兩水夾明鏡。雙橋落彩虹。人烟寒橘柚。秋色老梧桐。誰念北樓上。臨風懷謝公。

望天門山

天門中斷楚江開。碧水東流至北迴。兩岸青山相對出。孤帆一片日邊來。

望木瓜山



早起見日出。暮見棲鳥還。客心自酸楚。况對木瓜山。

登敬亭北二小山余時客逢崔侍御並登此地

送客謝亭北。逢君縱酒還。屈盤戲白馬。大笑上青山。迴鞭指長安。西日落秦關。帝鄉三千里。杳在碧雲間。

過崔八丈水亭

高閣橫秀氣。清幽併在君。簷飛宛溪水。窗落敬亭雲。猿嘯風中斷。漁歌月裏聞。閑隨白鷗去。沙上自爲羣。

登廣武古戰場懷古

秦鹿奔野草。逐之若飛蓬。項王氣蓋世。紫電明雙瞳。呼吸八千人。橫行起江東。赤精斬白帝。叱咤入關中。兩龍不並躍。五緯與天同。楚滅無英圖。漢興有成功。按劍清八極。歸酣歌大風。伊昔臨廣武。

連兵決雌雄。分我一杯羹。太皇乃汝翁。戰爭有古跡。壁壘頽層穹。  
猛虎嘯洞壑。飢鷹鳴秋空。翔雲列曉陣。殺氣赫長虹。撥亂屬豪聖。  
俗儒安可通。沉湎呼豎子。狂言非至公。撫掌黃河曲。嘖嘖阮嗣宗。

□ 古近體詩共五十八首 □

安州應城玉女湯作

神女歿幽境。湯池流大川。陰陽結炎炭。造化開靈泉。地底爍朱火。  
沙旁歛素烟。沸珠躍明月。皎鏡涵空天。氣浮蘭芳滿。色漲桃花然。  
精覽萬殊入。潛行七澤連。愈疾功莫尙。變盈道乃全。濯纓掬清泚。  
晞髮弄潺湲。散下楚王國。分澆宋玉田。可以奉巡幸。奈何隔窮偏。  
獨隨朝宗水。赴海輸微涓。

之廣陵宿常二南郭幽居

綠水接柴門。有如桃花源。忘憂或假草。滿院羅叢萱。暝色湖上來。  
微雨飛南軒。故人宿茅宇。夕鳥棲楊園。還惜詩酒別。深爲江海言。  
明朝廣陵道。獨憶此傾樽。

夜下征虜亭

船下廣陵去。月明征虜亭。山花如綉頰。江火似流螢。

下途歸石門舊居

吳山高。越水清。握手無言傷別情。將欲辭君挂帆去。離魂不散烟郊  
樹。此心鬱悵誰能論。有愧叨承國士恩。雲物共傾三月酒。歲時同餞  
五侯門。羨君素書常滿案。含丹照白霞色爛。余嘗學道窮冥筌。夢中  
往往遊仙山。何當脫屣謝時去。壺中別有日月天。俛仰人間易凋朽。  
鍾峯五雲在軒牖。惜別愁窺玉女窓。歸來笑把洪崖手。隱居寺。隱居

山。陶公鍊液棲其間。靈神閉氣昔登攀。恬然但覺心緒閒。數人不知幾甲子。昨來猶帶冰霜顏。我離雖則歲物改。如今了然識所在。別君莫道不盡歡。懸知樂客遙相待。石門流水徧桃花。我亦曾到秦人家。不知何處得雞豕。就中仍見繁桑麻。翛然遠與世事閒。裝鸞駕鶴又復遠。何心長從七貴遊。勞生徒聚萬金產。挹君去。長相思。雲遊雨散從此辭。欲知悵別心易苦。向暮春風楊柳絲。

客中作

蘭陵美酒鬱金香。玉碗盛來琥珀光。但使主人能醉客。不知何處是他鄉。

太原早秋

歲落衆芳歇。時當大火流。霜威出塞早。雲色渡河秋。夢遶邊城月。

心飛故國樓。思歸若汾水。無日不悠悠。

奔亡道中五首

蘇武天山上。田橫海島邊。萬重關塞斷。何日是歸年。

其二

亭伯去安在。李陵降未歸。愁容變海色。短服改胡衣。

其三

談笑三軍却。交游七貴疎。仍留一隻箭。未射魯連書。

其四

函谷如玉關。幾時可生還。洛陽爲易水。嵩岳是燕山。俗變羌胡語。

人多沙塞顏。申包惟慟哭。七日鬢毛斑。

其五

淼淼望湖水。青青蘆葉齊。歸心落何處。日沒大江西。歇馬傍春草。欲行遠道迷。誰忍子規鳥。連聲向我啼。

郢門秋懷

郢門一爲客。巴月三成弦。朔風正搖落。行子愁歸旋。杳杳山外日。茫茫江上天。人迷洞庭水。鴈度瀟湘烟。清曠諧宿好。緇磷及此年。百齡何蕩漾。萬化相推遷。空謁蒼梧帝。徒尊溟海仙。已聞蓬海淺。豈見三桃園。倚劍增浩嘆。捫襟還自憐。終當遊五湖。濯足滄浪泉。

至鴨欄驛上白馬磯贈裴侍御

側疊萬古石。橫爲白馬磯。亂流若電轉。舉棹揚珠輝。臨驛卷緹幕。升堂接繡衣。情親不避馬。爲我解霜威。

荆門浮舟望蜀江

春水月峽來。浮舟望安極。正是桃花流。依然錦江色。江色綠且明。茫茫與天平。逶迤巴山盡。遙曳楚雲行。雪照聚沙雁。花飛出谷鶯。芳洲却已轉。碧樹森森迎。流目浦烟夕。揚帆海月生。江陵識遙火。應到渚宮城。

## 上三峽

巫山夾青天。巴水流若茲。巴水忽可盡。青天無到時。三朝上黃牛。三暮行太遲。三望又三暮。不覺鬢成絲。

## 自巴水舟行經瞿唐峽登巫山最高峯晚還題壁

江行幾千里。海月十五圓。始經瞿唐峽。遂步巫山巔。巫山高不窮。巴國盡所歷。日邊攀垂蘿。霞外倚穹石。飛步凌絕頂。極目無纖烟。却願失舟壑。仰解臨青天。青天若可捫。銀漢去安在。望雲知蒼梧。

記水辨瀛海。周遊孤光晚。歷覽幽意多。積雪照空谷。悲風鳴森柯。歸途行欲曠。佳趣尙未歇。江寒早啼猿。松暝已吐月。月色何悠悠。清猿響啾啾。辭山不忍聽。揮策還孤舟。

早發白帝城

朝辭白帝彩雲間。千里江陵一日還。兩岸猿聲啼不盡。輕舟已過萬重山。

秋下荆門

霜落荆門江樹空。布帆無恙挂秋風。此行不爲鱸魚膾。自愛名山入剡中。

江行寄遠

剡木出吳楚。危檣百餘尺。疾風吹片帆。日暮千里隔。別時酒猶在。



已爲異鄉客。思君不可得。愁見江水碧。

宿五松山下荀媪家

我宿五松下。寂寥無所歡。田家秋作苦。鄰女夜春寒。跪進雕胡飯。月光素明盤。令人慙漂母。三謝不能飡。

下涇縣陵陽溪至澁灘

澁灘鳴嘈嘈。兩山足猿獠。百波若卷雪。側石不容舠。漁子與舟人。撐折萬張篙。

下陵陽沿高溪三門六刺灘

三門橫峻灘。六刺走波瀾。石驚虎伏起。水狀龍縈盤。何慙七里瀨。使我欲垂竿。

夜泊黃山聞殷十四吳吟

昨夜誰爲吳會吟。風生萬壑振空林。龍驚不敢水中臥。猿嘯時聞巖下音。我宿黃山碧溪月。聽之却罷松間琴。朝來果是滄洲逸。酤酒提盤飯霜粟。半酣更發江海聲。客愁頓向杯中失。

宿鰕湖

鷄鳴發黃山。暝投鰕湖宿。白雨映寒山。森森似銀竹。提携採鉛客。結荷水邊沐。半夜四天開。星河爛人目。明晨大樓去。崗隴多屈伏。當與持斧翁。前溪伐雲木。

西施

西施越溪女。出自苧蘿山。秀色掩今古。荷花羞玉顏。浣紗弄碧水。自與清波閑。皓齒信難開。沉吟碧雲間。勾踐徵絕艷。揚蛾入吳關。提携館娃宮。杳渺詎可攀。一破夫差國。千秋竟不還。

## 王右軍

右軍本清真。瀟灑在風塵。山陰遇羽客。要此好鵝賓。掃素寫道經。筆精妙入神。書罷籠鵝去。何曾別主人。

## 上元夫人

上元誰夫人。偏得王母嬌。嵯峨三角髻。餘髮散垂腰。裘披青毛錦。身著赤霜袍。手提羸女兒。閑與鳳吹簫。眉語兩自笑。忽然隨風飄。

## 蘇臺覽古。

舊苑荒臺楊柳新。菱歌清唱不勝春。只今惟有西江月。曾照吳王宮裏人。

## 越中覽古

越王句踐破吳歸。義士還家盡錦衣。宮女如花滿春殿。只今惟有鷓鴣

飛。

商山四皓

白髮四老人。昂藏南山側。偃蹇松雲間。冥翳不可識。雲窓拂青靄。石壁橫翠色。龍虎方戰爭。於焉自休息。秦人失金鏡。漢祖昇紫極。陰虹濁太陽。前星遂淪匿。一行佐明兩。歛起生羽翼。功成身不居。舒卷在胸臆。宵冥合元化。茫昧信難測。飛聲塞天衢。萬古仰遺跡。

過四皓墓

（77）  
——集詩白太李——  
我行至商洛。幽獨訪神仙。園綺復安在。雲蘿尙宛然。荒涼千古跡。蕪沒四墳連。伊昔鍊金鼎。何年閉玉泉。隴寒唯有月。松古漸無烟。木魅風號去。山精雨嘯旋。紫芝高咏罷。青史舊名傳。今日併如此。哀哉信可憐。

## 峴山懷古

訪古登峴首。憑高眺襄中。天清遠峯出。水落寒沙空。弄珠見遊女。  
醉酒懷山公。感嘆發秋興。長松鳴夜風。

## 蘇武

蘇武在匈奴。十年持漢節。白雁上林飛。空傳一書札。牧羊邊地苦。  
落日歸心絕。渴飲月窟水。飢食天上雪。東還沙塞遠。北愴河梁別。  
泣把李陵衣。相看淚成血。

## 經下邳圯橋懷張子房

子房未虎嘯。破產不爲家。滄海得壯士。椎秦博浪沙。報韓雖不成。  
天地皆振動。潛匿遊下邳。豈曰非智勇。我來圯橋上。懷古欽英風。  
唯見碧流水。曾無黃石公。歎息此人去。蕭條徐泗空。

金陵三首

晉家南渡日。此地舊長安。地卽帝王宅。山爲龍虎盤。金陵空壯觀。天塹淨波瀾。醉客迴橈去。吳歌且自歡。

其二

地擁金陵勢。城迴江水流。當時百萬戶。夾道起朱樓。亡國生春草。王宮沒古邱。空餘後湖月。波上對瀛洲。

其三

六代興亡國。三杯爲爾歌。苑方秦地少。山似洛陽多。古殿吳花草。深宮晉綺羅。併隨人事滅。東逝與滄波。

秋夜板橋浦汎月獨酌懷謝眺

天上何所有。迢迢白玉繩。斜低建章闕。耿耿對金陵。漢水舊如練。

霜江夜清澄。長川瀉落月。洲渚曉寒凝。獨酌板橋浦。古人誰可徵。立暉難再得。灑酒氣填膺。

過彭蠡湖

謝公之彭蠡。因此遊松門。余方窺石鏡。兼得窮江源。前賞迹可見。後來道空存。而欲繼風雅。豈惟清心魂。雲海方動興。波濤何足論。青嶂憶遙月。綠蘿愁鳴猿。水碧或可採。金膏秘莫言。余將振衣去。羽化出囂煩。

入彭蠡經松門觀石鏡緬懷謝康樂題詩書遊覽之志

謝公之彭蠡。因此遊松門。余方窺石鏡。兼得窮江源。將欲繼風雅。豈徒清心魂。前賞逾所見。後來道空存。况屬臨汎美。而無洲渚喧。漾水向東去。漳流直南奔。空濛三川夕。迴合千里昏。青桂隱遙月。

綠楓鳴愁猿。水碧或可采。金精祕莫論。吾將學仙去。冀與琴高言。

廬江主人婦

孔雀東飛何處棲。廬江小吏仲卿妻。爲客裁縫君自見。城烏獨宿夜空啼。

陪宋中丞武昌夜飲懷古

清景南樓夜。風流在武昌。庾公愛秋月。乘興坐胡床。龍笛吟寒水。天河落曉霜。我心還不淺。懷古醉餘觴。

望鸚鵡洲懷禰衡

魏帝營八極。蟻觀一禰衡。黃祖斗筭人。殺之受惡名。吳江賦鸚鵡。落筆超羣英。鏘鏘振金玉。句句欲飛鳴。鷺鷥啄孤鳳。千春傷我情。五岳起方寸。隱然詎可平。才高竟何施。寡識冒天刑。至今芳洲上。



蘭蕙不忍生。

宿巫山下

昨夜巫山下。猿聲夢裏長。桃花飛淥水。三月下瞿塘。雨色風吹去。南行拂楚王。高邱懷宋玉。訪古一霑裳。

金陵白楊十字巷

白楊十字巷。北夾湖溝道。不見吳時人。空生唐年草。天地有反覆。宮城盡傾倒。六帝餘古邱。樵蘇泣遺老。

謝公亭

謝亭離別處。風景每生愁。客散青天月。山空碧水流。池花春映日。窗竹夜鳴秋。今古一相接。長歌懷舊遊。

紀南陵題五松山

聖達有去就。潛光愚其德。魚與龍同池。龍去魚不測。當時板築輩。豈知傳說情。一朝和殷人。光氣爲列星。伊尹生空桑。捐庖佐皇極。桐宮放太甲。攝政無愧色。二年帝道明。委質終輔翼。曠哉至人心。萬古可爲則。時命或大謬。仲尼將奈何。鸞鳳忽覆巢。麒麟不來過。龜山蔽魯國。有斧且無柯。歸來歸去來。宵濟越洪波。

夜泊牛渚懷古

牛渚西江夜。青天無片雲。登舟望秋月。空憶謝將軍。余亦能高詠。斯人不可聞。明朝挂帆席。楓葉落紛紛。

姑熟十咏

姑熟溪

愛此山水閑。乘流興無極。漾楫怕鷗驚。垂竿待魚食。波翻曉霞影。

岸疊春山色。何處浣紗人。紅顏未相識。

丹陽湖

湖與元氣連。風波浩難止。天外賈客歸。雲間片帆起。龜遊蓮葉上。鳥宿蘆花裏。少女棹輕舟。歌聲逐流水。

謝公宅

青山日將暝。寂寞謝公宅。竹裏無人聲。池中虛月白。荒庭衰草徧。廢井蒼苔積。唯有清風閑。時時起泉石。

凌歊臺

曠望登古臺。臺高極人目。疊嶂列遠空。雜花間平陸。閑雲入窗牖。野翠生松竹。欲覽碑上文。苔侵豈堪讀。

桓公井

相公名已古。廢井曾未竭。石磴冷蒼苔。寒泉澆孤日。秋來桐暫落。春至桃還發。路遠人罕窺。誰能見清澈。

慈姥竹

野竹攢石生。含烟映江島。翠色落波深。虛聲帶寒早。龍吟曾未聽。鳳曲吹應好。不學蒲柳凋。真心常自保。

望夫山

顛望臨碧空。怨情感離別。江草不知愁。巖花但爭發。雲山萬重隔。音信千里絕。春去秋復來。相思幾時歇。

牛渚磯

絕壁臨巨川。連峯勢相向。亂石流沓間。迴波自成浪。但驚羣木秀。莫測精靈狀。更聽猿夜啼。憂心醉江上。

## 靈墟山

丁令辭世人。拂衣向仙路。伏鍊九丹成。方隨五雲去。松蘿蔽幽洞。桃杏深隱處。不知曾化鶴。遼海歸幾度。

□古近體詩共四十七首□

與元丹邱方城寺談玄作

茫茫大夢中。惟我獨先覺。騰轉風火來。假合作容貌。滅除昏疑盡。領略入精要。澄慮觀此身。因得通寂照。朗悟前後際。始知金仙妙。幸逢禪居人。酌玉坐相召。彼我俱若喪。雲山豈殊調。清風生虛空。明月見談笑。怡然青蓮宮。永願恣遊眺。

尋高鳳石門山中元丹邱

尋幽無前期。乘興不覺遠。蒼崖渺難涉。白日忽欲晚。未窮三四山。

已歷千萬轉。寂寂聞猿愁。行行見雲收。高松來好月。空谷宜清秋。  
谿深古雪在。石斷寒泉流。峯巒秀中天。登眺不可盡。丹邱遙相呼。  
顧我忽而哂。遂造窮谷間。始知靜者閑。留歡達永夜。清曉方言還。

安州般若寺水閣納涼喜遇薛員外又

翛然金園賞。遠近含晴光。樓臺成海氣。草木皆天香。忽逢青雲士。  
共解丹霞裳。水退池上熱。風生松下涼。吞討破萬象。拳窺臨衆芳。  
而我遺有漏。與君用無方。心垢都已滅。永言題禪房。

魯中都東樓醉起作

昨日東樓醉。還應倒接籬。阿誰扶上馬。不省下樓時。

對酒醉題屈突明府廳

陶令八十日。長歌歸去來。故人建昌宰。借問幾時迴。風落吳江雪。

紛紛入酒杯。山翁今已醉。舞袖爲君開。

月下獨酌四首

花間一壺酒。獨酌無相親。舉杯邀明月。對影成三人。月旣不解飲。影徒隨我身。暫伴月將影。行樂須及春。我歌月徘徊。我舞影零亂。醒時同交歡。醉後各分散。永結無情遊。相期邈雲漢。

其二

天若不愛酒。酒星不在天。地若不愛酒。地應無酒泉。天地旣愛酒。愛酒不媿天。已聞清比聖。復道濁如賢。賢聖旣已飲。何必求神仙。三盃通大道。一斗合自然。但得酒中趣。勿爲醒者傳。

其三

三月咸陽城。千花晝如錦。誰能春獨愁。對此徑須飲。窮通與修短。

造化夙所稟。一樽齊死生。萬事固難審。醉後失天地。兀然就孤枕。不知有吾身。此樂最爲甚。

其四

窮愁千萬端。美酒三百杯。愁多酒雖少。酒傾愁不來。所以知酒聖。酒酣心自開。辭粟臥首陽。屢空飢顏回。當代不樂飲。虛名安用哉。蟹卽金液。糟邱是蓬萊。且須飲美酒。乘月醉高臺。

春歸終南山松龍舊隱

我來南山陽。事事不異昔。却尋溪中水。還望巖下石。薔薇緣東窗。女蘿遶北壁。別來能幾日。草木長數尺。且復命酒樽。獨酌陶永夕。

冬夜醉宿龍門覺起言志

醉來脫寶劍。旅憩高堂眠。中夜忽驚覺。起立明燈前。開軒聊直望。



曉雪河冰壯。哀哀歌苦寒。鬱鬱獨惆悵。傳說版築臣。李斯鷹犬人。  
歛起匡社稷。寧復長難辛。而我胡爲者。嘆息龍門下。富貴未可期。  
殷憂向誰寫。去去淚滿襟。舉聲梁甫吟。青雲當自致。何必求知音。

## 尋山僧不遇作

石徑入丹壑。松門閉青苔。閑階有鳥跡。禪室無人開。窺窗見白拂。  
挂壁生塵埃。使我空嘆息。欲去仍徘徊。香雲徧山起。花雨從天來。  
已有空樂好。况聞青猿哀。了然絕世事。此地方悠哉。

## 過汪氏別業二首

遊山誰可遊。子明與浮邱。疊嶺礙河漢。連峯橫斗牛。汪生面北阜。  
池館清且幽。我來感意氣。槌魚列珍羞。掃石待歸月。開池漲寒流。  
酒酣益爽氣。爲樂不知秋。

其二

疇昔未識君。知君好賢才。隨山起館宇。鑿石營池臺。星火五中月。景風從南來。數枝石榴發。一丈荷花開。恨不當此時。相過醉金罍。我行值木落。月苦清猿哀。永夜達五更。吳歛送瓊杯。酒酣欲起舞。四座歌相催。日出遠海明。軒車且徘徊。更遊龍潭去。枕石拂莓苔。

待酒不至

玉壺繫青絲。沽酒來何遲。山花向我笑。正好銜杯時。晚酌東窗下。流鶯復在茲。春風與醉客。今日乃相宜。

獨酌

春草如有意。羅生玉堂陰。東風吹愁來。白髮坐相侵。獨酌勸孤影。閑歌面芳林。長松爾何知。蕭瑟爲誰吟。手舞石上月。膝橫花間琴。

過此一壺外。悠悠非我心。

友人會宿

滌蕩千古愁。留連百壺飲。良宵宜清談。皓月未能寢。醉來臥空山。天地卽衾枕。

春日獨酌二首

東風扇淑氣。水木榮春暉。白日照綠草。落花散且飛。孤雲還空山。衆鳥各已歸。彼物皆有託。吾生獨無依。對此石上月。長醉歌芳菲。

其二

我有紫霞想。緬懷滄洲間。且對一壺酒。澹然萬事閑。橫琴倚高松。把酒望遠山。長空去鳥沒。落日孤雲還。但恐光景晚。宿昔或秋顏。

金陵江上遇蓬池隱者

心愛名山遊。身隨名山遠。羅浮麻姑臺。此去或未返。遇君蓬池隱。就我石上飯。空言不成歡。強笑惜日晚。綠水向雁門。黃雲蔽龍山。嘆息兩客鳥。徘徊吳越間。共語一執手。留連夜將久。解我紫綺裘。且換金陵酒。酒來笑復歌。興酣樂事多。水影弄月色。清光奈愁何。明晨掛帆席。離恨滿滄波。

月夜聽盧子順彈琴

閑夜坐明月。幽人彈素琴。忽聞悲風調。宛若寒松吟。白雪亂纖手。綠水清虛心。鍾期久已沒。世上無知音。

青溪半夜聞笛

羌笛梅花引。吳溪隴水情。寒山秋浦月。腸斷玉關聲。

日夕山中忽然有懷

久臥青山雲。遂爲青山客。山深雲更好。賞弄終日夕。月銜樓間峯。泉漱階下石。素心自此得。真趣非外借。颺桂方秋。風滅籟歸寂。緬思洪崖術。欲往滄海隔。雲車來何遲。撫已空嘆息。

夏日山中

嬾搖白羽扇。裸袒青林中。脫巾挂石壁。露頂灑松風。

山中與幽人對酌

兩人對酌山花開。一杯一杯復一杯。我醉欲眠卿且去。明朝有意抱琴來。

春日醉起言志

處世若大夢。胡爲勞其生。所以終日醉。頽然臥前楹。覺來盼庭前。一鳥花間鳴。借問此何時。春風語流鶯。感之欲嘆息。對酒還自傾。

浩歌待明月。曲盡已忘情。

廬山東林寺夜懷

我尋青蓮宇。獨往謝城闕。霜清東林鐘。水白虎溪月。天香生虛空。天樂鳴不歇。宴坐寂不動。大千入毫髮。湛然冥真心。曠劫斷出沒。

尋雍尊師隱居

羣峭碧摩天。逍遙不記年。撥雲尋古道。倚樹聽流泉。花暖青牛臥。松高白鶴眠。語來江色暮。獨自下寒烟。

與史郎中欽聽黃鶴樓上吹笛

一爲遷客去長沙。西望長安不見家。黃樓鶴中吹玉笛。江城五月落梅花。

對酒

勸君莫拒杯。春風笑人來。桃李如舊識。傾花向我開。流鶯啼碧樹。明月窺金罍。昨日朱顏子。今日白髮催。棘生石虎殿。鹿走姑蘇臺。自古帝王宅。城闕閉黃埃。君若不飲酒。昔人安在哉。

醉題王漢陽廳

我似鷓鴣鳥。南遷嬾北飛。時尋漢陽令。取醉月中歸。

嘲王歷陽不肯飲酒

地白風色寒。雪花大如手。笑殺陶淵明。不飲杯中酒。浪撫一張琴。虛栽五株柳。空負頭上巾。吾於爾何有。

獨坐敬亭山

衆鳥高飛盡。孤雲獨去閑。相看兩不厭。只有敬亭山。

自遣

對酒不覺暝。落花盈我衣。醉起步溪月。鳥還人亦稀。

訪戴天山道士不遇

犬吠水聲中。桃花帶露濃。樹深時見鹿。溪午不聞鍾。野竹分青靄。飛泉挂碧峯。無人知所去。愁倚兩三松。

秋日與張少府楚城韋公藏書高齋作

日下空亭暮。城荒古跡餘。地形連海盡。天影落江虛。舊賞人雖隔。新知樂未疎。綵雲思作賦。丹壁問藏書。杳擁隨流葉。萍開出水魚。夕來秋興滿。回首意何如。

秋夜獨坐懷故山

小隱慕安石。遠遊學子平。天書訪江海。雲臥起咸京。入侍瑤池宴。出陪玉輦行。誇胡新賦作。練獵短書成。但奉紫霄顧。非邀青史名。



莊周空說劍。墨翟恥論兵。拙薄遂疎絕。歸閑事耦耕。顧無蒼生望。空愛紫芝榮。寥落暝霞色。微茫舊壑情。秋山綠蘿月。今夕爲誰明。

憶崔郎中宗之遊南陽遺吾孔子琴撫之潛然感舊  
昔在南陽城。唯漁獨山蕨。憶與崔宗之。白水弄素月。時過菊潭上。縱酒無休歇。泛此黃金花。頽然清歌發。一朝摧玉樹。生死殊飄忽。留我孔子琴。琴存人已沒。誰傳廣陵散。但哭邙山骨。泉戶何時明。長歸狐兔窟。

憶東山二首

不向東山久。薔薇幾度花。白雲還自散。明月落誰家。

其二

我今携謝妓。長嘯絕人羣。欲報東山客。開關掃白雲。

望月有懷

清泉映疎松。不知幾千古。寒月搖清波。流光入窗戶。對此空長吟。思君意何深。無因見安道。興盡愁人心。

對酒憶賀監二首

太子賓客賀公。於長安紫極宮一見余。呼余爲謫仙人。因解金龜換酒爲樂。悵然有懷而作是詩。四明有狂客。風流賀季真。長安一相見。呼我謫仙人。昔好盃中物。今爲松下塵。金龜換酒處。却憶淚沾巾。

其二

狂客歸四明。山陰道士迎。敕賜鏡湖水。爲君臺沼榮。人亡餘故宅。空有荷花生。念此杳如夢。淒然傷我情。

重憶一首

欲向江東去。定將誰舉杯。稽山無賀老。却棹酒船回。

春滯沅湘有懷山中

沅湘春色還。風暖烟草綠。古之傷心人。於此腸斷續。予非懷沙客。但美採菱曲。所願歸東山。寸心於此足。

落日憶山中

雨後烟景綠。晴天散餘霞。東風隨春歸。發我枝上花。花落時欲暮。見此令人嗟。願遊名山去。學道飛丹砂。

憶秋浦桃花舊遊時竄夜郎

桃花春水生。白石今出沒。搖蕩女蘿枝。半挂青天月。不知舊行徑。初拳幾枝蕨。三載夜郎還。於茲鍊金骨。

# 古近體詩共六十五首

## 越中秋懷

越水遶碧山。周迴數千里。乃是天鏡中。分明畫相似。愛此從冥搜。  
 永懷臨湍遊。一爲滄波客。十見紅蕖秋。觀濤壯天險。望海令人愁。  
 路遐迫西照。歲晚悲東流。何必探禹穴。逝將歸蓬邱。不然五湖上。  
 路可乘扁舟。

## 效古二首

朝入天苑中。謁帝蓬萊宮。青山映輦道。碧樹搖烟空。謬題金閨籍。  
 得與銀臺通。待詔奉明主。抽毫頌清風。歸時落日晚。蹀躞浮雲驄。  
 人馬本無意。飛馳自豪雄。入門紫鴛鴦。金井雙梧桐。清歌絃古曲。  
 美酒沽新豐。快意且爲樂。列筵坐羣公。光景不可留。生世如轉蓬。

早達勝晚遇。羞比垂釣翁。

其二

自古有秀色。西施與東鄰。峨眉不可妬。况乃効其贖。所以尹婕好。羞見邢夫人。低頭不出氣。塞默少精神。寄語無鹽子。如君何足珍。

擬古十二首

青天何歷歷。明星如白石。黃姑與織女。相去不盈尺。銀河無鵲橋。非時將安適。閨人理紈素。遊子悲行役。瓶冰如冬寒。霜露欺遠客。客似秋葉飛。飄飄不言歸。別後羅帶長。愁寬去時衣。乘月託宵夢。因之寄金徽。

其二

高樓入青天。下有白玉堂。明月看欲墮。當窗懸清光。遙夜一美人。

羅衣霑秋霜。舍情弄柔琴。彈作陌上桑。絃聲何激烈。風卷繞飛梁。行人昔躑躅。棲鳥去迴翔。但寫妾意苦。莫辭此曲傷。願逢同心者。飛作紫鴛鴦。

其三

長繩難繫日。自古共悲辛。黃金高北斗。不惜買陽春。石火無留光。還如世中人。卽事已如夢。後來我誰身。提壺莫辭貧。取酒會四鄰。仙人殊恍惚。未若醉中眞。

其四

清都綠玉樹。灼爍瑤臺春。攀莫弄秀色。遠贈天仙人。香風送紫蘂。直到扶桑津。恥掇世上艷。所貴心之珍。相思傳一笑。聊欲示情親。

其五

今日風日好。明日恐不如。春風笑於人。何乃愁自居。吹簫舞彩鳳。酌醴鱸神魚。千金買一醉。取樂不求餘。達士遺天地。東門有二疏。愚夫同瓦石。有才知卷施。無事坐悲苦。塊然涸轍駟。

## 其六

運速天地閉。胡風結飛霜。百草死冬月。六龍頽西荒。太白出東方。彗星揚精光。鴛鴦非越鳥。何爲眷南翔。惟昔鷹將犬。今爲侯與王。得水成蛟龍。爭池奪鳳凰。北斗不酌酒。南箕空簸揚。

## 其七

世路今太行。迴車竟何託。萬族皆凋枯。遂無少可樂。曠野多白骨。幽魂共銷鑠。榮貴當及時。春華宜照灼。人非岷山玉。安得長璀璨。身沒期不朽。榮名在鱗閣。

其八

月色不可掃。客愁不可道。玉露生秋衣。流螢飛百草。日月終銷毀。天地同枯槁。蟋蟀啼青松。安見此樹老。金丹寧誤俗。昧者難精討。爾非千歲翁。多恨去世早。飲酒入玉壺。歲身以爲寶。

其九

生者爲過客。死者爲歸人。天地一逆旅。同悲萬古塵。月兔空擣藥。扶桑已成薪。白骨寂無言。青松豈知春。前後更嘆息。浮榮何足珍。

其十

仙人騎彩鳳。昨下閩風岑。海水三清淺。桃源一見尋。遺我綠玉盃。兼之紫瓊琴。盃以傾美酒。琴以閑素心。二物非世有。何論珠與金。琴彈松裏風。盃勸天上月。風月長相知。世人何倏忽。



## 其十一

涉江弄秋水。愛此荷花鮮。攀荷弄其珠。蕩漾不成圓。佳期綵雲重。欲贈隔遠天。相思無由見。悵望涼風前。

## 其十二

去去復去去。辭君還憶君。漢水既殊流。楚山亦此分。人生難稱意。豈得長爲羣。越燕喜海日。燕鴻思朔雲。別久容華晚。琅玕不能飯。日落知天昏。夢長覺道遠。望夫登高山。化石竟不返。

## 感興八首

瑤姬天帝女。精彩化朝雲。宛轉入夢宵。無心想楚君。錦衾抱秋月。綺席空蘭芬。茫昧竟誰測。虛傳宋玉文。

## 其二

洛浦有宓妃。飄飄雪爭飛。輕雲拂素月。了可見清輝。解珮欲西去。含情詎相違。香塵動羅襪。淥水不沾衣。陳王徒作賦。神女豈同歸。好色傷大雅。多爲世所譏。

其三

裂素持作書。將寄萬里懷。眷眷待遠信。竟歲無人來。征鴻務隨陽。又不爲我棲。委之在深篋。蠹魚壞其題。何如投水中。流落他人開。不惜他人開。但恐生是非。

其四

芙蓉嬌綠波。桃李誇白日。偶蒙春風榮。生此艷陽質。豈無佳人色。但恐花不實。宛轉龍火飛。零落互相失。詎知凌寒松。千載長守一。

其五

十五遊神仙。仙遊未曾歇。吹笙吟松風。汎瑟窺海月。西山玉童子。使我鍊金骨。欲逐黃鶴飛。相呼向蓬闕。

## 其六

西國有美女。結樓青雲端。峨眉艷曉月。一笑傾城歡。高節不可奪。炯心如凝丹。常恐彩色晚。不爲人所觀。安得配君子。共乘雙飛鸞。

## 其七

竭來荆山客。誰爲珉玉分。良寶絕見棄。虛持三獻君。直木忌先伐。芬蘭哀自焚。盈滿天所損。沉冥道所羣。東海有碧水。西山多白雲。魯連及夷齊。可以躡清芬。

## 其八

嘉穀隱豐草。草深苗且稀。農夫旣不異。孤穗將安歸。常恐委疇隴。

忽與秋蓬飛。鳥得薦宗廟。爲君生光輝。

寓言二首

周公負斧戣。成王何夔夔。武王昔不豫。剪爪投河湄。賢聖遇讒慝。不免人君疑。天風拔大木。禾黍咸傷萎。管蔡扇蒼蠅。公賦鴟鴞詩。金縢若不啓。忠信誰明之。

其二

遙裔雙綵鳳。婉孌三青擒。往還瑤臺裏。鳴舞玉山岑。以歡秦娥意。復得王母心。區區精衛鳥。啣木空哀吟。

其三

長安春色歸。光入青門道。綠楊不自持。從風欲傾倒。海燕還秦宮。雙飛入簾櫳。相思不相見。託夢遼城東。

## 秋夕旅懷

涼風度秋海。吹我鄉思飛。連山去無際。流水何時歸。目極浮雲色。心斷明月暉。芳草歇柔艷。白露催寒衣。夢長銀漢落。覺罷天星稀。含悲想舊國。泣下誰能揮。

## 感遇四首

吾愛王子晉。得道伊洛濱。金骨既不毀。玉顏長自春。可憐浮邱公。猗靡與情親。舉手白日間。分明謝時人。二仙去已遠。夢想空殷勤。

## 其二

可嘆東籬菊。莖疎葉且微。雖言異蘭蕙。亦自有芳菲。未泛盈樽酒。徒沾清露輝。當榮君不採。飄落欲何依。

## 其三

昔余聞姮娥。竊藥駐雲髮。不自矯玉顏。方希鍊金骨。飛去身莫返。含笑坐明月。紫宮誇娥眉。隨手會凋歇。

其四

宋玉事楚王。立身本高潔。巫山賦綵雲。郢路歌白雪。舉國莫能和。巴人皆卷舌。一惑登徒言。恩情遂中絕。

翰林讀書言懷呈集賢諸學士

晨趨紫禁中。夕待金門詔。觀書散遺帙。探古窮至妙。片言苟會心。掩卷忽而笑。青蠅易相點。白雪難同調。本是疎散人。屢貽褊促譎。雲天屬清朗。林壑憶游眺。或時清風來。閒倚欄下嘯。巖光桐廬溪。謝客臨海嶠。功成謝人間。從此一投釣。

尋陽紫極宮感秋作

何處聞秋聲。愴愴北窗竹。迴薄萬古心。攬之不盈掬。靜坐觀衆妙。浩然媚幽獨。白雲南山來。就我簷下宿。嬾從唐生決。羞訪季主卜。四十九年非。一往不可復。野情轉蕭散。世道有翻覆。陶令歸去來。田家酒應熟。

## 江上秋懷

餐霞臥舊壑。散髮謝遠遊。山蟬號枯桑。始復知天秋。朔雁別海裔。越燕辭江樓。颯颯風卷沙。茫茫霧縈洲。黃雲結暮色。白水揚寒流。惻愴心自悲。潺湲淚難收。蘅蘭方蕭瑟。長嘆令人愁。

## 秋夕書懷

北風吹海雁。南渡落寒聲。感此瀟湘客。悽其流浪情。海懷結滄水。霞想游赤城。始探蓬壺事。旋覺天地輕。澹然吟高秋。閑臥瞻太清。

蘿月掩空幕。松霜結前楹。滅見息羣動。獵微窮至精。桃花有源水。可以保吾生。

避地司空原言懷

南風昔不競。豪聖思經綸。劉琨與祖逖。起舞雞鳴晨。雖有匡濟心。終爲樂禍人。我則異於是。潛光皖水濱。卜築司空原。北將天柱鄰。雪霽萬里月。雲開九江春。俟乎太階平。然後託微身。傾家事金鼎。年貌可長新。所願得此道。終然保清真。弄景奔日馭。攀星戲河津。一隨王喬去。長年玉天賓。

上崔相百憂章

共工赫怒。天維中摧。鯤鯨噴蕩。揚濤起雷。魚龍陷人。此成禍胎。火焚崑山。玉石相鎚。仰希霖雨。灑寶炎煨。箭發石開。戈揮日迴。



鄒衍慟哭。燕霜颯來。微誠不感。猶繫夏臺。蒼鷹搏攫。丹棘崔嵬。  
豪聖凋枯。王風傷哀。斯文未喪。東岳豈頽。穆逃楚難。鄒脫吳災。  
見機苦遲。二公所哈。驥不驟進。麟何來哉。星離一門。草擲二孩。  
萬憤結緝。憂從中催。金瑟玉壺。盡爲愁媒。舉酒太息。泣血盈盃。  
台星再朗。天網重恢。屈法申恩。棄瑕取材。治長非罪。尼父無猜。  
覆盆儻舉。應照寒灰。

萬憤詞投魏郎中

海水渤潏。人羅鯨鯢。莽胡沙而四塞。始滔天於燕齊。何六龍之浩蕩。  
遷白日於秦西。九土星分。嗷嗷悽悽。南冠君子。呼天而啼。戀高  
堂而掩泣。淚血地而成泥。獄戶春而不草。獨幽怨而沉迷。兄九江兮  
弟三峽。悲羽化之雞齊。穆陵關北愁愛子。豫章天南隔老妻。一門骨

肉散百草。遇難不復相提携。樹榛拔桂。囚鸞寵雞。舜昔授禹。伯成耕  
犁。德自此衰。吾將安栖。好我者恤我。不好我者何忍臨危而相擠。  
子胥鴟夷。彭越醢醢。自古豪烈。胡爲此繫。蒼蒼之天。高乎視低。  
如其聽卑。脫我牢狴。儻辨美玉。君收白珪。

荊州賊亂臨洞庭言懷作

修蛇橫洞庭。吞象臨江島。積骨成巴陵。遺言聞楚老。水窮三苗國。  
地窄三湘道。歲晏天崢嶸。時危人枯槁。思歸阻喪亂。去國傷懷抱。  
郢路方邱墟。章華亦傾倒。風悲猿嘯苦。木落鴻飛早。日隱西赤沙。  
月明東城草。關河望已絕。氛霧行當掃。長叫天可聞。吾將問蒼昊。

覽鏡書懷

得道無古今。失道還衰老。自笑鏡中人。白髮如霜草。捫心空嘆息。

問影何枯槁。桃李竟何言。終成南山皓。

田園言懷

賈誼三年謫。班超萬里侯。何如牽白犢。飲水對清流。

江南春懷

青春幾何時。黃鳥鳴不歇。天涯失鄉路。江外老華髮。心飛秦塞雲。影滯楚關月。身世殊爛熳。田園久蕪沒。歲晏何所從。長歌謝金闕。

聽蜀僧濬彈琴

蜀僧抱綠綺。西下峨眉峯。爲我一揮手。如聽萬壑松。客心洗流水。遺響入霜鐘。不覺碧山暮。秋雲幾幾重。

魯東門觀刈蒲

魯國寒事早。初霜刈渚蒲。揮鎌若轉月。拂水生連珠。此草最可珍。

何必貴龍鬚。織作玉牀席。欣承清夜娛。羅衣能再拂。不畏素塵蕪。

詠鄰女東窗海石榴

魯女東窗下。海榴世所稀。珊瑚映綠水。未足比光輝。清香隨風發。落日好鳥歸。願爲東南枝。低舉拂羅衣。無由一攀折。引領望金扉。

南軒松

南軒有孤柯。松葉自綿冪。清風無閑時。蕭灑終日夕。陳生古苔碧。色染秋烟碧。何當凌雲霄。直上數千尺。

詠山樽二首

蟠木不彫飾。且將斤斧疎。樽成山岳勢。材是棟梁餘。外與金罍並。中涵玉醴虛。慚君垂拂拭。遂忝玳筵居。

其二

臃腫寒山木。嵌空成酒樽。愧無江海量。偃蹇在君門。

初出金門尋王侍御不遇咏壁上鸚鵡

落羽辭金殿。孤鳴託繡衣。能言終見棄。還向隴西飛。

紫藤樹

紫藤桂挂木。花蔓宜陽春。密葉隱歌鳥。香風留美人。

觀放白鷹二首

八月邊風高。胡鷹白錦毛。孤飛一片雪。百里見秋毫。

其二

寒冬十二月。蒼鷹八九毛。寄言燕雀莫相啁。自有萬里霄雲高。

觀博平王志安少府山水粉圖

粉壁爲空天。丹青狀江海。遊雲不知歸。日見白鷗在。博平真人王安

志。沉吟至此願挂冠。松溪石磴帶秋色。愁客思歸坐曉寒。

題雍邱崔明府丹竈

美人爲政本忘機。服藥求仙事不違。葉縣已泥丹竈畢。瀛洲當伴赤松歸。先師有訣神將助。大聖無心火自飛。九轉但能生羽翼。雙鳧忽去定何依。

觀元丹邱坐巫山屏風。

昔遊三峽見巫山。見畫巫山宛相似。疑是天邊十二峯。飛入君家綵屏裏。寒松蕭颯如有聲。陽臺微茫如有情。錦衾瑤席何寂寂。楚王神女徒盈盈。高咫尺。如千里。翠屏丹崖粲如綺。蒼蒼遠樹圍荆門。歷歷行舟泛巴水。水石潺湲萬壑分。烟光草色俱氤氳。溪花笑日何年發。江客聽猿幾歲聞。使人對此心緬邈。疑入高邱夢綵雲。

## 求崔山人百丈崖瀑布圖

百丈素崖裂。四山丹壁開。龍潭中噴射。晝夜生風雷。但見瀑泉落。如濺雲漢來。聞君寫真圖。島嶼備縈迴。石黛刷幽草。曾青澤古苔。幽緘儻相傳。何必向天台。

## 見野草中有名白頭翁者

醉入田家去。行歌荒野中。如何青草裏。亦有白頭翁。折取對明鏡。宛將衰鬢同。微芳似相諂。留恨向東風。

## 流夜郎題葵葉。

慙君能衛足。嘆我遠移根。白日如分照。還歸守故園。

## 瑩禪師房觀山海圖

眞僧閉精宇。滅跡含達觀。列障圖雲山。攢峯入霄漢。丹崖森在目。

清晝疑巷幔。蓬壺來軒窗。瀛海入几案。煙濤爭噴薄。島嶼相凌亂。征帆飄空中。瀑水灑天半。崢嶸若可涉。想像徒盈嘆。杳與真心冥。遂諧靜者翫。如登赤城裏。揭涉滄洲畔。卽事能娛人。從茲得蕭散。

## 白鷺鷥

白鷺下秋水。孤飛如墜霜。心閑且未去。獨立沙洲傍。

## 詠槿二首

園花笑芳年。池草艷春色。猶不如槿花。嬋娟玉堦側。芬榮何天促。零落在瞬息。豈若瓊樹枝。終歲長翕絕。

## 其二

世人種桃李。多在金張門。攀折爭捷徑。及此春風暄。一朝天霜下。榮耀難久存。安知南山桂。綠葉垂芳根。清陰亦可託。何惜樹君園。



## 白胡桃

紅羅袖裏分明見。白玉盤中看却無。疑是老僧休念誦。腕前推下水精珠。

## 巫山枕障

巫山枕障畫高邱。白帝城邊樹色秋。朝雲夜入無行處。巴水橫天更不流。

## 南奔書懷

遙夜何漫漫。空歌白石爛。寧戚未匡齊。陳平終佐漢。攬槍掃河洛。直割鴻溝半。曆數方未遷。雲雷屢多難。天人秉旄鉞。虎竹光藩翰。侍筆黃金臺。傳觴青玉案。不因秋風起。自有思歸嘆。主將動讒疑。王師忽離叛。自來白沙上。鼓噪丹陽岸。賓御如浮雲。從風各消散。

北寇無涯畔。顧乏七寶鞭。留連道傍翫。太白夜食昴。長虹日中貫。  
秦趙興天兵。茫茫九州亂。感遇明主恩。頗高祖述言。過江誓流水。  
志在清中原。拔劍擊前柱。悲歌難重論。

上海图书馆藏书



A541 212 0016 6736B



本書編號第00180

名家詩鈔  
李太白詩

發行：行人

出版者：大中華書局

上海鳳陽路同春坊三三號

中華民國三十三年十月七日版

基本定價：

按照 倍發售

15